

DIDZA' DXI'A BUZÚAJĚ' JUAN

Bönni' na' nazí'i lè' Didza' gúlajě' bönachi

1 ¹ Cate' gusí lo, zí'atëlö cate' si' gata' yödzölió, ni' zoa cazě' Bönni' lè' Didza', ate' Bönni' na' náquiě' Didza' zóaleně' Dios, ate' Didza' na' naca caz Dios. ² Bönni' na' náquiě' Didza' zóaleně' Dios cate' ni' gusí lo si' rata' yödzölió. ³ Lu nē'ě Bönni' ni, Dios beně' yúgu'tě le dē, en biti' bi dē le nuně' Dios le cabí beně' lu nē'ě Bönni' na'. ⁴ Dē caz queě' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi. ⁵ Ruzení' bení' na' ga naca chul-la que dul-la', pero biti' ca' sequi' le chul-la na' usulu bení' na'.

⁶ Dios gusól-lě'ě ni tu bönni' lè' Juan. ⁷ Bidě' bönni' ni para gáquiě' nu gun ba nalí. Bidě' para guně' ba nalí queě' Bönni' na' náquiě' bení', para tséjlě'gaca yúgu'tě bönachi Dios ni'a que lē na' runě' ba nalí. ⁸ Biti' náquiě' Juan bení' na', pero bidě' para guně' ba nalí queě' Bönni' na' náquiě' bení'. ⁹ Bönni' na' náquiě' bení' le naca idú ni' raziě' yödzölió ni, ate' ruzení'ě lu icja ládxi'do'gaca yúgu'tě bönachi.

¹⁰ Bönni' na' náquiě' bení' bidxině' yödzölió ni, ate' lu nē'ě Lě' Dios beně' yödzölió ni, pero bönachi yödzölió biti' bulu'únbě'ě Lě'.

¹¹ Bidxině' ga nequi queě', pero biti' ca' gula'zí' lu ná'agaquiě' Lě' bönni' nabábaleně'. ¹² Yúgu'tě bönni' gula'zí' lu ná'agaquiě' Lě', bönni' ni' gula'yéajlě'ě Jesús, Lě' beně' ga dē lu ná'agaquiě' ilácagaquiě' zxí'ině' Dios. ¹³ Bönni' ni nácagaquiě' zxí'ině' Dios, calěga tu' nácagaquiě' zxí'ině' nu bönni', en calěga tu' nálajgaquiě' ni'a que le rizě ládxi'ě nu bönni', o ni'a que tu le ré'ěně' nu bönni', pero nácagaquiě' caní tu' naca le ré'ěni quézině' Dios.

¹⁴ Bönni' na' náquiě' Didza' guljě' bönachi, en tu chí'isö guzóaleně' rě'u, idú dzágagaca Lě' le ruzá' ládxi'ě Dios queěru', en le naca idútě li. Bilé'etu' yöl-la' zxön queě', ate' yöl-la' zxön queě' na' naca le ruí'i queěbi' bi'i la's dui que, Nu na' naca Xúzibi'. ¹⁵ Juan na' beně' ba nalí queě' Bönni' na', en bē'ě zidzaj didza', rnně':

—Bönni' ni náquiě' Nu na' gudíxjō'a que, gunnía': Bönni' si' zá'tělě' ca neda' nayépisětě'rě' ca neda', tu' zoa cazě' Lě' zí'alö ca neda'.

¹⁶ Le naca idú queě' buzí'iru' xibé yúgu'těru', lē na' buzá' ládxi'ě queěru' Dios, en zíanrö ca' le ruzá' ládxi'ě queěru'. ¹⁷ Bidxín queěru' xibá queě' Dios lu nē'ě Moisés, pero le ruzá' ládxi'ě queěru' Dios, en le naca idútě li bila'dxín queěru' lu nē'ě Jesucristo. ¹⁸ Catu caz nu bilé'e Dios, pero Lě', la's dui Zxí'ině' Dios, Bönni' na' nadxí'ide'eně' Dios Xuz, Bönni' ni na' beně' ga núnbě'ěru'-nē' Dios.

Le benë' ba nalí Juan, bönni' buquilë' bönachi nisa, ca náquië' Jesús

(Mt. 3:1-12; Mr. 1:7-8; Lc. 3:1-17)

¹⁹ Lë ni naca le benë' ba nalí Juan, cate' ni' bönni' judío unná bë' nacu'ë Jerusalén gula'sól-lë'ë yugu' bixúz, en bönni' nabábagaquië' Leví, nupa ni nácgaca ni'a ná'agaquië' bixúz, para ila'nábinë' Juan na', ila'nnë':

—¿Nuzxi bönni' li'?

²⁰ Yálajdo' bë'ë didza' Juan, en biti' gudá'baguië', pero gudíxjö'ë catëz naca, rnnë':

—Biti' naca' Cristo, Bönni' na' guxzí' lu në'ë Dios isól-lë'ë queëru'.

²¹ Ní'irö gula'nábinë' lë' leyúbölö, të' lë':

—¿Nuzxi caz li'? ¿Naru' nacu' li' Elías, bönni' bë'ë didza' uláz queë' Dios dza ni'të?

Gunnë' Juan:

—Biti' naca'.

Ní'irö të' lë':

—¿Naru' nacu' li' bönni' na' ral-la' guídë' gu'ë didza' uláz queë' Dios?

Bubi'ë didza' Juan, rnnë':

—Calëga neda'.

²² Ní'irö të' lë':

—¿Nuzxi caz nacu'? Gudíxjöi'i netu' para gaca usiyöntu' nupa gula'sól-la' netu'. ¿Bizxi rnno' li' nuzxi nacu'?

²³ Bubi'ë didza' Juan, rë' légaquië':

—Neda' naca' bönni' na', nazúaj lu guichi lá'ayi ca naca queë', rnna: Riyón chi'i nu rulidza lu lataj cá'asö, rnna: Buli'béaj li nöza para idxín Xanru' queéli'. Caní gunné' Isaías, bönni' na' bë'ë didza' uláz queë' Dios.

²⁴ Yugu' bönni' ni nácgagaquië' bönni' yudo' fariseo nasól-la'gaquië' bönni' judío unná bë'. ²⁵ Gula'nábinë' Juan, të' lë':

—¿Bizx que ruquilu' bönachi nisa channö cabí nacu' li' Cristo, en biti' nacu' Elías, en calëga bönni' na' ral-la' guídë' gu'ë didza' uláz queë' Dios?

²⁶ Bubi'ë didza' Juan na', rë' légaquië':

—Neda' ruquila' bönachi nisa lu nisa, pero gatsaj láhui'lö ga zóali' zoë' tu bönni' biti' núnbë'ëli'-në'. ²⁷ Bönni' ni náquië' Bönni' na' si' zá'tëlë' ca neda', en nayépisëtërë' ca neda', ate' biti' naca' neda' lesaca' ulecja' xiráchuë' nudé'ë.

²⁸ Yúgu'të lë ni guca lu xiyú yödzö Betábara, ga naca ia'tsölá'a yegu Jordán, zaca' ga rilén gubidza, ga ni' buquilë' Juan bönachi nisa.

Jesús náquië' ca bö'cu' zxíla'do' tutië'-ba' lahuë' Dios tu' nözi dul-la'

²⁹ Dza buropi ni' Juan bilé'enë' Jesús, zë'ë ga zoë', ate' rnnë':

—Buli'yútsöca'. Bönni' ni náquië' bö'cu' zxíla'do' queë' Dios, gátië' para ugüë' dul-la' nabága'gaca bönachi yödzölió. ³⁰ Lë' náquië' bönni' na' gunnía' queë': “Si' zá'tëlë' ca neda' tu bönni', nayépisëtërë' ca neda', tu' zoa cazë' zí'alö ca neda'.” ³¹ Neda' biti' bénbë'a-në' zí'alö, pero bida', ruquila' bönachi nisa para ilúnbë'e bönachi Israel Lë'.

³² Benë' ba nalí Juan ca naca queë' Jesús, rnnë':

—Bilé'eda'-në' Dios Bö' Lá'ayi, bö'tjë' birúajë' yehua' yubá, guné'ë ca riná'aba' gu'dödo', ate' bidxinë' ga zoë' Jesús, en bugá'analenë' Lë'.

³³ Biti' bénbe'eda' Lë' zí'alö. Gudxi neda' Nu na' gusól-la' neda' para uquila' bönachi nisa, gunné': “Cate' ilé'enu'-në' huötjë' Dios Bö' Lá'ayi, tsöjsóalenë' Bönni' na', en ugá'analenë' Lë', Bönni' ni gunë' le ruluí'isö yöl-la' ridila nisa ni, uchízië' bönachi Dios Bö' Lá'ayi.” ³⁴ Na'a, chibilé'eda' lë na', en runa' ba nalí queë' Bönni' ni, náquië' Zxí'inë' Dios.

Yugu' bönni' usëda zí'alö queë' Jesús

³⁵ Ia'tú dza ca', leyúbölö zoë' Juan ni', ate' nacuá'lenë' lë' chopë' bönni' dá'gaquië' lë'. ³⁶ Cate' Juan na' bilé'enë' Jesús, ridödë' ni', ní'irö gudxë' bönni' na' dá'gaquië' lë', rnnë':

—Buli'yútsöca'. Ni' zoë' bönni' na' náquië' bö'cu' zxíla'do' queë' Dios, gatië' uláz quegaca bönachi dul-la'.

³⁷ Chopë' bönni' na' dá'gaquië' Juan bila'yönnë' didza' ni bë'ë lë', ate' yöjnógaquië' Jesús. ³⁸ Ní'irö buécjë' Jesús, en buyúë' chopë' ni söjnógaquië' Lë', ate' rë' légaquië':

—¿Bizxi riguíljali'?

Të' Lë':

—Bönni' Usedi, ¿gazxi zu'?

³⁹ Bubi'ë didza' Jesús, rë' légaquië':

—Guli'dá, uyuli'.

Ní'irö yójácalenë' Lë', en bila'lé'enë' ga na' zoë', ate' bulu'gá'analenë' Lë' dza na', tu' chizá' ral-la.

⁴⁰ Andrés, bóchë'ë Simón Pedro, náquië' tuë' bönni' chopë' ni' bila'yönnë' didza' bë'ë Juan, en yöjnógaquië' Jesús. ⁴¹ Andrés na', zí'alö yöjdiljë' bönni' bóchë'ë, lë' Simón, ate' rë' lë':

—Chibidzólitu'-në' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasól-lë'ë Dios.

⁴² Ní'irö Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':

—Li' nacu' Simón, zxí'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guiôj.

Jesús rulidzë' Felipe, en Natanael

⁴³ Cate' za' rení' ia'tú dza, gú'unnë' Jesús tsejë' luyú Galilea, ate' yöjxáquië' Felipe, en rë' lë':

—Gudá' neda'.

⁴⁴ Náquië' Felipe bönni' yödzö Betsaida, le naca ládzagaquië' Andrés, en Pedro. ⁴⁵ Felipe budzólinë' Natanael, en rë' lë':

—Chibidzólitu'-në' bönni' na' buzúajë' Moisés ca naca queë' lu guichi lu xibá queë' Dios, ate' bulu'zúajë' ca' ca naca queë' bönni' gulu'ë didza' uláz queë' Dios. Bönni' ni Jesús, zxí'inë' José, bönni' yödzö Nazaret.

⁴⁶ Natanael rë' lë':

—¿Naru' huala'tsö Nazaret tu le naca dxi'a?

Felipe rë' lë':

—Gudá uyú'.

⁴⁷ Cate' bilé'enë' Jesús zë'ë Natanael na' ga zoë', rnnë':

—Buli'yú ni tu bönni' náquië' idú bönni' Israel, en biti' rnnasë' ca' bönni' ni.

⁴⁸ Ní'irö Natanael gunábinë' Jesús, rë' Lë':

—¿Naru' núnbë'tso' neda'?

Bubi'ë didza' Jesús, rë' lë':

—Cate' si' ulídzatërë' Felipe li', cate' ni' zu' zxaan yaga higo, bilé'eda' li'.

⁴⁹ Ní'irö bubi'ë didza' Natanael, rë' Lë':

—Bönni' Usedi, Li' nacu' Zxí'inë' Dios. Li' nacu' Nu inná be'e bönachi Israel.

⁵⁰ Bubi'ë didza' Jesús, rë' lë':

—¿Réajlë'tso' tu' gudxa' li': Bilé'eda' li' zxaan yaga higo? Yugu' le zxóntërö ca lë ni hualé'enu'.

⁵¹ Lësca' caní rë' Jesús légaquië', rnnë':

—Le nácatë rea' libí'ili', ilé'eli' nayalaj lúzxiba, en ta'benë', en tu'huötjë' gubáz lá'ayi queë' Dios ga zoa' neda', Bönni' Guljë' Bönachi.

Laní que yöl-la' rutsaga na' le guca lu yödzö Caná

2 ¹ Cate' chiguca tsonna dza, guca laní que yöl-la' rutsaga na' lu yödzö Caná luyú Galilea, ate' zóanu xiné'ë Jesús ni'. ² Lësca' zoa nu bulidza Jesús, en yugu' bönni' usëda queë' dijáquië' laní na'. ³ Cate' biyadzaj xisi uva ilé'ajë', ní'irö xiné'ë Jesús gúdxinu Lë', rnnanu:

—Biti'rö dë xisi uva ilé'ajë'.

⁴ Bubi'ë didza' Jesús, rë'ë-nu:

—Nígúlado'. ¿Bizx que rulidzu' neda'? Biti' ca' ridxini dza ulu'a lahui yöl-la' huáca quia'.

⁵ Ní'irö xiné'ë Jesús gúdxinu bönni' huen dxin ta'gu'ë le tahuë',
rnnanu:

—Guli'gún yúgu'të le guíë' libí'ili'.

⁶ Nacuá' ni' xopa yusu' guiój tu'gunë' dxin bönni' judío cate' tu'pá'a cuíngaquië' ca nalébiguequinë' tunë', en rúdzugaca chopá tsonna rō'ō nisa tu tu yusu' na'. ⁷ Jesús gudxë' yugu' bönni' huen dxin na', rnnë':

—Buli'lí yugu' yusu' ni nisa.

Bulu'líë' yugu' yusu' na' nisa. ⁸ Ní'irö Jesús rë' légaquië':

—Guli'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. ⁹ Buyúë' bönni' na' zoë' ra' yusu' channö nazxí'i nisa na' nuhuōáca xisi uva, pero bití' réquibe'enë' gazxi za'. Nóziguequinë' bönni' huen dxin na' guláchë'ë nisa na'. Ní'irö bönni' na' zoë' ra' yusu' bulidzë' bönni' rutsaga në'ë, ¹⁰ en rë' lë':

—Zí'alö tu'nödzjë' yúgu'të bönni' xisi uva nácarö sizxí'i, en cate' chigulé'ajë' yenni', ní'irö tu'nödzjë' le cabí nazxí'i. Lí, ga bidxintë na'a ben chí'u xisi uva nácarö sizxí'i.

¹¹ Yöl-la' huáca naca bë' ni benë' Jesús lu yödzö Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxön queë', ate' gula'yéajlë'ë Lë' bönni' usëda queë'.

¹² Gudödi na' guyijë' Jesús yödzö Capernaum, ate' dzágagaquië' xiné'ë, en yugu' bönni' bóchë'ë, en yugu' bönni' usëda queë' Lë', ate' zían dza gula'cu'ë Capernaum na'.

Rulatjë' Jesús lö'a yudo', rubéajë' nupa tun le cabí ral-la' ilún ni'

(Mt. 21:12-13; Mr. 11:15-18; Lc. 19:45-46)

¹³ Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, guyijë' Jesús yödzö Jerusalén. ¹⁴ Lu yödzö na' yójxáquië' Jesús nacu'ë bönni' lö'a yudo' ga na' túti'ë-ba' yugu' bēdxi, en yugu' bö'cu' zxila', en yugu' gu'dōdo', böa' bēdxi na' tūtigaquië'-ba' lahuë' Dios. Ró'ōgaquië' ca' ni' bönni' tu'tsé'ë dumí za' idútë yödzölió. ¹⁵ Cate' bilé'enë' Jesús lë ni, buzalë' yugu' du lasi le quindë' bōnachi na', ate' bulágui'ë yúgu'të' ní'ilö lö'a yudo', en bulágui'ë-ba' ca' ní'ilö yugu' bö'cu' zxila', en yugu' bēdxi. Bēsü'ë' dumí quégaquië' bönni' na' tu'tsé'ë dumí lu yu, en burixë' yugu' blaga quégaquië'. ¹⁶ Ní'irö Jesús gudxë' bönni' na' túti'ë-ba' yugu' gu'dōdo', rnnë':

—Guli'cúa yugu' lë ni. Bití' únili' lidxë' Xuza' tu yé'ëyi.

¹⁷ Ní'irö yōjnéguequinë' bönni' usëda queë' Jesús le nazúaj lu guichi lá'ayi, rna: Tu' ruí'ida' lādxa'a lidxu', régui rilá lādxi'da'ahua'.

¹⁸ Ní'irö bulu'bi'ë didza' bönni' judío unná bë' nacu'ë ni', tē' Jesús:

—¿Bizxi yöl-la' huáca uluí'inu' netu' le gaca bë' dē lu no'o runu' yugu' lë ni?

¹⁹ Bubi'ë didza' Jesús, rë' légaquië':

—Guli'quínnej yudo' ni, ate' tsonna dzasö uchisa' le.

²⁰ Ní'irö të' Lë' bönni' judío, ta'nné':

—Idú xopa-un iz guyá' yudo' ni, ate' Li', ¿tsonna dzasö uchísatso' le?

²¹ Yudo' na' bë'ë didza' que Jesús naca la' cuin cazë'. ²² Que lë ni na', cate' bubanë' Jesús lu yöl-la' guti, yöjnéguequinë' bönni' usëda queë' Jesús ca na' gunné', ate' gula'yéajlë' le nazúaj lu guichi lá'ayi, enca' yugu' didza' bë'ë Jesús.

Jesús núnbë'ë yúgu'të bönachi

²³ Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zían Lë', tu' bila'lé'enë' yugu' yöl-la' huáca runë'.

²⁴ Biti' buzxöni ládxë'ë Jesús légaquië', tu' nunbë' cazë' yúgu'të bönachi.

²⁵ Biti' naquínnë' Jesús nu quíxjöi'i Lë' ca nátagaca bönachi, tu' nöz quézinë' Lë' le yu'u icja ládxí'do'gaca bönachi.

Jesús, en Nicodemo

3 ¹ Nicodemo, tu bönni' yudo' fariseo, nabábalenë' yugu' bönni' judío unná bë'. ² Bidë' bönni' ni ga zoë' Jesús chi'i dzó'ölö, en rë' Lë':

—Bönni' Usedi. Réquibe'etu' nasól-lë'ë Dios Li' para usédinu' netu'. Biti' séqui'në' tu bönni' gunë' yugu' yöl-la' huáca nátagaca bë' ca nátagaca le caní runu' Li' channö cabí zóalenë' Dios lë'.

³ Bubi'ë didza' Jesús, rë' lë':

—Le nácatë rea' li', nu cabí galaj leyúbölö, biti' ca' ilé'e lataj ga ni' rinná bë'ë Dios.

⁴ Nicodemo gunábinë' Lë', rnnë':

—¿Nacxi caz séqui'në' tu bönni' galjë' leyúbölö cate' chináquië' bönni' gula? ¿Naru' huácatsö tsu'ë leyúbölö lé'ënu xiné'ë, ate' galjë' ia'tú?

⁵ Bubi'ë didza' Jesús, rë' lë':

—Le nácatë rea' li'. Nu bönni' cabí galjë' ni'a que nisa, en ni'a queë' Dios Bö' Lá'ayi, biti' gaca tsázië' ga rinná bë'ë Dios. ⁶ Nu na' nalaj lu ni'a lu na' bönachi, bönáchisö naca, pero nu nalaj ni'a queë' Dios Bö' Lá'ayi, Bö' Lá'ayi nabani nu na'. ⁷ Biti' ubániu' tu' rea' li', run bayudxi galju' leyúbölö. ⁸ Gátitës recja bö', ate' riyönnu' rnnë bö' na', pero biti' nózinu' gazxi za', o gazxi zeaj. Lësca' caní raca quégaca nupa náljagaca ni'a queë' Dios Bö' Lá'ayi.

⁹ Ní'irö Nicodemo gunábinë' Jesús, rnnë':

—¿Nacxi caz gaca lë ni?

¹⁰ Bubi'ë didza' Jesús, rë' lë':

—¿Ruséditsenu' li' bönachi Israel, en biti' nózinu' yugu' lë ni? ¹¹ Le nácatë rea' li', le nöztu' ruí'itu' didza' que, en le bilé'etu' runtu' ba nalí que, pero biti' rizí' lu ná'ali' lë na' runtu' ba nalí. ¹² Channö cabí

réajlë'ëli' neda' cate' ru'ílena' libí'ili' didza' ca naca le raca yödzülió ni, ñnacxi caz gaca tséajlë'ëli' channö guía' libí'ili' le raca yehua' yubá?

¹³ 'Catu caz gurenë' nu bönni' yehua' yubá, pero tuza' neda', Bönni' Guljë' Bönachi, bötja' birúaja' yehua' yubá, ate' zoa caza' ni' yehua' yubá. ¹⁴ Ca na' benë' Moisés lu lataj cá'asö, buchisë'-ba' bëla néquiniba' guié, budé'ë-ba' lë'e yaga, lësca' caní run bayudxi gaca quia' neda', Bönni' Guljë' Bönachi, ulu'chisë' neda' xitsá'. ¹⁵ Caní gaca quia', para cabí ila'niti yúgu'të nupa ila'yéajlë' neda', pero gata' quéguequi yöl-la' na'bán idú.

Dios nadxí'ide'enë' bönachi yödzülió

¹⁶ Tu' bidxí'ide'enë' Dios bönachi yödzülió, buzá' ládxë'ë quéguequi Zxí'inë' la' buduínë', para cabí ila'niti yúgu'të nupa ila'yéajlë' Lë', pero gata' yöl-la' na'bán idú quéguequi. ¹⁷ Dios gusól-lë'ë Zxí'inë' yödzülió ni, calëga para ichúguië' quégaca bönachi yödzülió ni gátigaca, pero para ulu'lágaca bönachi yödzülió ni ni'a queë' Lë'.

¹⁸ Nu bönni' réajlë'ë Zxí'inë' Dios, biti' ca' narugu queë' inítië', pero bönni' na' biti' réajlë'ë Lë', chinarugu queë' gátie', tu' cabí réajlë'ë Zxí'inë' Dios la' buduínë'. ¹⁹ Que lë ni na' chinarugu quégaca bönachi gátigaca, tu' bidxinë' Bönni' na' náquië' bení' yödzülió ni, pero gulunrö zxön bönachi ni le naca chul-la' que dul-la' ca gulunë' zxön Bönni' na' náquië' bení', tu' nácagaca xihui' le tunë'. ²⁰ Yúgu'të bönni' tu'ë dö' biti' raza ládxí'gaquië' bení', en biti' rídigaquië' lu bení', para cabí ilá' lahui le tunë'. ²¹ Nu run le naca idútë li ridxín lu bení' para gaca bë' núngaca ni'a queë' Dios le run nu na'.

Juan, bönni' ruquilë' bönachi nisa, ru'ë didza' ca naca queë' Jesús

²² Gudödi na', Jesús guyéajlenë' bönni' dá'gaquië' Lë', ate' bila'dxinë' luyú Judea, en guzóalenë' légaquië' ni', ga na' tu'quilë' bönachi nisa.

²³ Lësca' ruquilë' Juan bönachi nisa ga nazí'i le Enón, gala' ga dë yödzo Salím, tu' dë nisa zila lataj na', ate' ta'dxín bönachi ni', en ta'dila nisa.

²⁴ Raca caní zí'atëlö cate' biti' idzunë' Juan na' lidxi guié.

²⁵ Ní'irö gula'sí lógaquië' bal-lë' bönni' dá'gaquië' Juan ta'díl-lalenë' yugu' bönni' judío didza' ca naca que yöl-la' ruchi'a cuini que yudo'.

²⁶ Bila'dxinë' ga zoë' Juan, en të' lë':

—Bönni' usedi. Buyútsöca'. Bönni' na' guzóalenë' li' ia'tsölá'a yegu Jordán, bönni' na' benu' ba nalí queë', ruquilë' bönachi nisa, ate' ta'dxín yúgu'të bönachi ga zoë'.

²⁷ Ní'irö bubi'ë didza' Juan, rë' légaquië':

—Biti' bi dë lu në'ë nu bönni', channö cabí nudödë' Dios le lu në'ë.

²⁸ Biyón quézili' lë na' bena' ba nalí, gunnía': "Biti' naca' neda' Cristo", pero Dios nasól-lë'ë neda' para guía' bönachi si' zë'ë Lë'. ²⁹ Bönni' na' rizi'ë-bi' bi'i nigula rutsaga ná'abi' náquië' bönni' rutsaga në'ë, pero

böchi' luzé'ë bönni' rutsaga në'ë, en dzáguie' lè', ruzé náguie' didza' ru'ë, en rudzéjanë' tu' riyönnë' didza' ru'ë bönni' rutsaga në'ë. Lësca' caní, rudzéjade'eda' neda' tu' raca lè ni caní. ³⁰ Run bayudxi gácarë' zxön Cristo, pero neda', run bayudxi gácara' cuídi'sö.

Nu za' zaca' yehua' yubálö

³¹ Gunné' ca' Juan:

—Bönni' na' zë'ë zaca' xitsá'alö nayépisëtërë' ca yúgu'të bönachi. Nu bönni' náquie' bönachi yödzölió ni, que yödzölió ni náquie', en ru'ë didza' que le raca yödzölió ni, pero Bönni' na' zë'ë zaca' yehua' yubálö nácatërë' lo ca yúgu'të bönachi. ³² Bönni' na' runë' ba nalí que le bilé'enë', en le biyönnë', pero cuntú nu rizí' lu në'e le runë' ba nalí. ³³ Núti'tës bönni' rizí' lu në'ë lè na' runë' ba nalí, bönni' ni rulu'ë lahui réajlë'ë naca idútë li didza' ru'ë Dios. ³⁴ Bönni' na' nasól-lë'ë Dios, didza' queë' Dios ru'ë, tu' nuzóadërë' Dios Bó' Lá'ayi queë' lu Bönni' na'. ³⁵ Dios Xuz nadxí'inë' Zxí'inë', ate' yúgu'të le dë chinudödë' lu në'ë Zxí'inë' na'. ³⁶ Nu bönni' réajlë'ë Dios Zxí'ini, dë yöl-la' na'bán idú queë', pero bönni' na' bití' réajlë'ë Dios Zxí'ini, bití' idéli'në' yöl-la' na'bán na', pero nabáguë'ë xíguia' lahuë' Dios.

Jesús ruí'ilenë'-nu didza' tu nigula Samaria

4 ¹ Bila'yönnë' bönni' yudo' fariseo ca na' dá'gaca Jesús zíanrö bönachi ca dá'gaca Juan, ate' ruquilë' ca' nisa zíanrö bönachi ca ruquilë' nisa Juan. ² Calëga Jesús caz ruquilë' bönachi nisa, pero bönni' usëda queë' tu'quilë' bönachi nisa. ³ Cate' gúquibe'enë' Jesús lè ni, buzé'ë luyú Judea, ate' sa'yéajë' leyúbölö luyú Galilea.

⁴ Ga ni' sa'yéajë', run bayudxi tödë' luyú Samaria. ⁵ Caní guca, bidxinë' Jesús tu yódzödo' luyú Samaria, nazí'i le Sicar, gala' ga dë yu na' bunödzjë' Jacob queébi' José, zxí'inë' Jacob na', dza ni'te. ⁶ Lataj na' zoa tu yeru nisa nachó'önë' Jacobo na' ga rë'. Cate' bidxinë' Jesús ni', gurö'ë ra' yeru nisa na' tu' yöjxéqui'në' yu'ë nöza. Guca idú huagubidza. ⁷ Ní'irö bidxinu tu nigula Samaria ni' para sí'inu nisa. Jesús rë'ë-nu:

—Benna le guí'ja'.

⁸ Tuzë' zoë' Jesús tu' chisöjáquie' bönni' usëda queë' lu yödzö söjxí'gaquie' le ilahuë'. ⁹ Ní'irö nigula Samaria na' rënu Jesús, rnnanu:

—¿Rinábitsenu' neda' le guí'ju', en nacu' bönni' judío? Neda' ni naca' nigula Samaria.

Caní gunnúnu tu' cabí ta'dzaga dxi'a bönachi Samaria len bönachi judío.

¹⁰ Bubi'ë didza' Jesús, rë'ë-nu:

—La'tu' núnbë'u le runödzjë' Dios, en Nuzxi na' rë li': “Benna le guí'ja'”, li' inabu', ate' Lë' gunné' quiu' nisa runna yöl-la' na'bán.

¹¹ Ní'irö nigula na' rënu Lë', rnnanu:

—Bönni', biti' nu'u le cuéaju' nisa, ate' yeru nisa ni, dxí'tërö rö'.
 ¿Gazxi dë nisa na' runna yöl-la' na'bán? ¹² ¿Naru' nácatërötso' Li' zxön
 ca xúziru' gudödi Jacob, bönni' ni' bennë' queétu' yeru nisa ni, ga ni
 guzxi'ë nisa gu'ë, en gulé'ajbi' ca' zxí'inë', en gulé'ajba' ca' böa' bëdxi
 queë'?

¹³ Bubi'ë didza' Jesús, rë'ë-nu:

—Núti'tës nu guí'aj nisa ni, leyúbölö ubidxi nisa, ¹⁴ pero nu guí'aj nisa
 na' unödza' neda', bíti'rö ubidxi icja ládxi'da'ahuë', tu' unödza' queë'
 nisa na' gaca lu icja ládxi'da'ahuë' ca tu ga ralaj nisa, le güí'i yöl-la'
 na'bán idú queë'.

¹⁵ Ní'irö nigula na' rënu Lë', rnnanu:

—Bönni', benna quia' nisa na', para cabirö ubidxa', en cabirö uduzxi'a
 nisa ni.

¹⁶ Jesús rë'ë-nu:

—Guyéaj, yöjlidzë' bönni' quiu', ate' huödu' ni.

¹⁷ Bubí'inu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rnno': "Cuntu nu zoa bönni' quia'", ¹⁸ tu' chiguzóalenu'
 gayu' bönni', ate' bönni' na' zóalenu'-në' na'a, biti' náquië' bönni' quiu'.
 Didza' ni ru'u, ca nácatë rnno'.

¹⁹ Ní'irö nigula na' rënu Lë', rnnanu:

—Bönni', runi neda' nacu' bönni' ru'ë didza' uláz queë' Dios. ²⁰ Xuz
 xtó'oru' guléquinë' Dios le bach lu guí'a ni, pero rnnali' libí'ili'
 Jerusalén naca ga ral-la' ilequi bönachi Dios le bach.

²¹ Jesús rë'ë-nu:

—Nigula, guyéajlë' neda'. Za' dza cate' tseaj ládxi'li'-në' Dios Xuz sal-
 la' biti' idisóali' guí'ado' ni, en biti' tsöjsóali' Jerusalén. ²² Libí'ili' reaj
 ládxi'li' Nu biti' núnbë'ëli', pero netu' núnbë'ëtu' Nu na' reaj ládxi'tu',
 tu' benë' queë' Dios ilá' lahui yöl-la' rusölá ni'a quégaquië' bönni' judío.

²³ Na'a, za' dza, en chiridxín dza na', cate' nupa le nácatë ta'yéaj
 ládxi'gaca Dios, ila'yéaj ládxi'gaca Lë', zóalenë' Dios Bö' Lá'ayi léguequi,
 en le naca idútë li, tu' ré'ënë' Dios Xuz ilácagaquië' queë' bönni' ila'yéaj
 ládxi'gaquië' Lë' caní. ²⁴ Dios náquië' Bö', ate' nupa ta'yéaj ládxi'gaca
 Lë', run bayudxi ila'yéaj ládxi'gaca Lë', zóalenë' Dios Bö' Lá'ayi
 léguequi, en le naca idútë li.

²⁵ Ní'irö nigula na' rënu Lë', rnnanu:

—Nözda' ral-la' guídë' Mesías, Bönni' na' lë' Cristo. Cate' guídirë' Lë'
 quíxjöi'inë' rë'u yúgu'të.

²⁶ Jesús rë'ë-nu:

—Lë' cazë' ruí'ilenë' li' didza'.

²⁷ La' ná'asö bulu'dxinë' bönni' usëda queë' Jesús, ate' bulu'bánninë' tu'
 ruí'ilenë'-nu nigula didza', pero biti' burúguinë' nitúë' inábinë' Lë', cabí

inné': "¿Bizxi rinábinu' lënu?" o: "¿Bizxi didza' ruí'ilenu'-nu?" ²⁸ Ní'irö nigula na' buca'ananu xichö'önu ni', ate' böajnu la' yödzo, söjódxinu nupa nacuá' ni', rnnanu:

²⁹ —iGuli'dá, ilé'eli'-në' tu bönni' gudxë' neda' yúgu'të le chinuna'!
¿Naru' cabí nácatsë' Lë' Cristo?

³⁰ Ní'irö bila'ruaj bönachi yödzo na', en bila'dxín ga zoë' Jesús.

³¹ Tsanni ni' söhuóajnu nigula na', bönni' usëda queë' Jesús gulunë' bayudxi, të' Lë':

—Bönni' Usedi, gudagu.

³² Jesús rë' légaquië':

—Dë tu le rahua', le cabí réquibe'eli'.

³³ Ní'irö gula'nabi luzá'agaquië' bönni' usëda queë' tuë' ia'tué', ta'nné':

—¿Zoa nu chidiguá'tsö le gudahuë'?

³⁴ Ní'irö Jesús rë' légaquië':

—Le nabánida' naca guna' ca ré'ënë' Xuza' nasól-lë'ë neda', en údxi guna' xichinë'. ³⁵ Caní rnnali' libí'ili': "Ia'tapa beo' huadxín dza uláparu'." Neda' rea' libí'ili': Guli'chisa loli' uyuli' bönachi nácagaca ca gapa nadúzgaca, le chinabídxigaca para tsöjláparu'. ³⁶ Bönni' na' rulapë' rizi'ë laxjë', ate' lë na' rulapë' bönni' na', naca para gata' yöl-la' na'bán idú quégaca bönachi, para gaca ulu'dzeja tsözxón nu raza, en nu rulapa. ³⁷ Naca idútë li lë na' rnna caní: Tu nu raza, ate' ia'tú nu rulapa. ³⁸ Neda' gusól-la'a libí'ili' tsöjlápali' ga biti' gúzali'. Gulún bönachi yúbölö dxin guláz, ate' libí'ili' ruzí'ili' xibé dxin na' núngaquië'.

³⁹ Zián bönachi Samaria nacuá' yödzo Sicar na' gula'yéajlë'ë Jesús ni'a que xtídza'nu nigula na' bennu ba nalí queë', gunnúnu: "Gudxë' neda' yúgu'të le chinuna'." ⁴⁰ Cate' bila'dxinë' bönni' Samaria ga ni' zoë' Jesús, guláta'yuë' lahuë' ugá'analënë' légaquië'. Jesús bugá'anë' ni' ia'chopa dza. ⁴¹ Caní guca, ziántërë' ca' bönni' ni' gula'yéajlë'ë Jesús ni'a que didza' bë'ë. ⁴² Ní'irö bönni' ni' gulé'-nu nigula na', ta'nné':

—Na'a réajlë'ëtu' Lë', calégasö ni'a que didza' bë'u li', pero lësca' tu' biyönitu' netu' Lë', en nöztu' le nácate bönni' ni náquië' Cristo, Nu rusölá bönachi yödzölió.

Ruúnë' Jesús zxí'inë' tuë' bönni' dë lu në'ë

⁴³ Ia'chopa dza ca', buzé'ë Jesús luyú Samaria, en sa'yéajë' luyú Galilea. ⁴⁴ Caní benë', tu' gudíxjö'ë Lë cazë' Jesús, gunné': "Bönachi uládz queë' nu bönni' ru'ë didza' uláz queë' Dios biti' tun lë' bal."

⁴⁵ Cate' bidxinë' Jesús luyú Galilea, gulunë' bönni' Galilea na' Lë' bal tu' yöjáquië' ca' Jerusalén cate' guca Laní Pascua, en bila'lé'enë' le benë' Jesús ni'.

⁴⁶ Ní'irö böajë' Jesús yödzo Caná luyú Galilea, ga ni' benë' ga böáca nisa xisi uva. Lu yödzo Capernaum na' zoë' tu bönni' dë lu në'ë uláz

queë' bönni' rinná bè'ë, ate' ré'ebi' bi'i bönni' queë' bönni' na' dë lu në'ë. ⁴⁷ Cate' biyönnë' bönni' ni chibuzë'ë Jesús luyú Judea, en budxinë' luyú Galilea na', ní'irö guyijë' ga na' zoë' Jesús, en gúta'yuë' lahuë' guídë' lidxë', para uduhuénë'-bi' bi'i bönni' queë' na', tu' chirequi gátibi'. ⁴⁸ Ní'irö Jesús rë' lë':

—Biti' ca' tséajlë'ëli' channö cabí ilé'eli' le nácagaca bè', en yugu' yöl-la' huáca guna'.

⁴⁹ Ní'irö bönni' na' dë lu në'ë uláz queë' bönni' rinná bè'ë gudxë' Jesús, rnnë':

—Bönni', gudía'të para cabí gátibi' bi'i quia'.

⁵⁰ Ní'irö Jesús rë' lë':

—Böaj lidxu'. Nabanbi' bi'i quiu'.

Bönni' ni guyéajlë'ë didza' bè'ë Jesús, ate' söhuó'jë'. ⁵¹ Tsanni ni' yu'ë nöza söhuó'jë', duzxí'gala'gaquië' lë' bönni' huen dxin queë' ate' gula'guíxjöi'inë' lë', ta'nnë':

—Nabanbi' bi'i quiu'.

⁵² Gunábinë' légaquië' bátaxi gusí lo ruhuó'aca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

⁵³ Ní'irö gúquibe'enë' xúzibi' bi'i na', böácabi' cate' ni' bé'lenë' Jesús lë' didza', en gudxë' lë': “Nabanbi' bi'i quiu'.” Que lë' ni na' guyéajlë'ë Jesús, ate' gula'yéajlë' ca' Lë' bönachi nacuá' lidxë'.

⁵⁴ Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

Ruúnë' Jesús tu bönni' nacú'unië' bin ga nazí'i le Betesda

5 ¹ Gudödi guca lë' ni, guca laní' quégaquië' bönni' judío, ate' guyijë' Jesús Jerusalén. ² Lu yödzö na', gala' ga tu'ú'uba' bö'cu' zxila', dë tu le zxön yudzu nisa, nazí'i le Betesda lu didza' hebreo, en nacuá' gayu' chila don que. ³ Yugu' lu chila na' dégaquië' zían bönni' té'enë', bönni' nachul-la lógaquië', en bönni' bití' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'. ⁴ Caní' raca, tu' ruhuó'tjë' tu gubáz lá'ayi queë' Dios tu chi'i huéaj, en röjtsu'ë lu nisa na', en ruté' nisa na'. Huó'acatë' nu bönni' tsöjtsú'utië' lu nisa na' cate' rutá cuini ca naca bíti'tës yödzöhué' raca queë'. ⁵ Zoë' tu bönni' ni', chiguca chizxunu' uruá' iz ré'enë'. ⁶ Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba ré'ënu' huó'acu'?

⁷ Bubi'ë didza' bönni' huë' na', rë' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéaja' neda', röjtsu'ë bönni' yúbölö zí'alö ca neda'.

⁸ Jesús rë' lë':

—Guyaschi. Buá' le denu', en guzë'e.

⁹ La' böácate' bönni' na', ate' bu'ë le gúti'në', en guzë'ë. Dza na' raca caní naca dza lá'ayi quégaquië' bönni' judío. ¹⁰ Ní'irö bönni' judío unná bë' gulë' bönni' na' nuhuöáquië', ta'nnë':

—Dza lá'ayi naca na'a. Biti' ral-la' u'u le ráti'nu'.

¹¹ Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunné': “Buá' le denu', en guzë'e.” Bönni' na' bunë' neda'.

¹² Ní'irö gula'nábinë' lë', ta'nnë':

—¿Nuzxi na' gudxi caní li': “Buá' le denu', en guzë'e”?

¹³ Biti' nózinë' bönni' na' nuhuöáquië' nuzxi na', tu' chibuzë'ë Jesús lataj ni' tu' nacuá' bönachi zían ni'. ¹⁴ Gudödi guca lë ni, Jesús yöjxáquië' bönni' na' ga naca chila yudo', ate' rë' lë':

—Buyútsöca'. Chiböácu'. Bítirö gunu' dul-la', para cabí gaca quiu' tu le nácarö zi' ca lë na' guca quiu'.

¹⁵ Guyijë' bönni' na', yöjtíxjöi'inë' yugu' bönni' judío unná bë' Jesús na' bunë' lë'. ¹⁶ Que lë ni na' bönni' judío unná bë' gula'bía ládxi'gaquië' Jesús, en gulë'ënnë' ilútië' Lë', tu' runë' yugu' lë ni cate' naca dza lá'ayi quégaquië'. ¹⁷ Bubi'ë didza' Jesús, rë' légaquië':

—Xuza' ná'atë runë' dxin, ate' neda' ca' runa' dxin.

¹⁸ Que lë ni na' gulë'ënirönë' bönni' judío unná bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní naca nun cuinë' ca náquië' Dios.

Yöl-la' unná bë' dë lu në'ë Zxí'inë' Dios

¹⁹ Ní'irö bubi'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia', pero tuz lë na' rilé'eda' runë' Dios Xuz. Yúgu'të le runë' Dios Xuz, lësca' caní runa' neda', Zxí'inë'. ²⁰ Dios Xuz nadxí'inë' neda', Zxí'inë', en ruluí'inë' neda' yúgu'të le runë', ate' yugu' le zxöntërö ca lë ni uluí'inë' neda', le ilún ga ubánili' libí'ili'. ²¹ Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní runa' neda', Zxí'inë', runödza' quégaca bönachi yöl-la' na'bán ca ré'ëni quézida'. ²² Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'të yöl-la' unná bë' para uchi'a usöró'a bönachi.

²³ Caní naca para ilún bal yúgu'të bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasól-lë'ë neda', Zxí'inë' na'.

²⁴ Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasól-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidé yöl-la' na'bán idú queë'. ²⁵ Le nácatë rea' libí'ili', za' dza, en chiridxín dza na', cate' ila'yöni nupa chinátigaca chi'a neda', Zxí'inë' Dios, ate' nupa ila'yöni xtídza'a, en ilún ca rnna, huóata' yöl-la' na'bán quéguequi. ²⁶ Ca na' dë

lu në'ë Dios Xuz unödzejë' yöl-la' na'bán quégaca bönachi, lësca' caní benë' ga dë lu na'a neda', Zxí'inë', unödzejä' yöl-la' na'bán quégaca bönachi. ²⁷ Lësca' caní budödë' lu na'a yöl-la' unná bë' uchi'a usöröa' bönachi, tu' naca' Bönni' Guljë' Bönachi. ²⁸ Biti' ubánili' ca naca lë ni, tu' huadxín dza cate' yúgu'të nupa chinátigaca ila'yöni chi'a, ²⁹ en ulu'ruáj yeru ba. Ulu'bán nupa na' gulún le naca tsahui', en huöáta' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

Le naca bë' le náquië' Jesús

³⁰ Gunnë' ca' Jesús:

—Biti' bi gaca guna' la' néda'sö. Ca naca le riyönda' rë' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca ré'ënisida' neda', pero ca ré'ëni quézinë' Xuza' nasól-lë'ë neda', runa'. ³¹ Channö neda' runa' ba nalí que la' cuin caza', bití' naca lesaca' lë na' runa' ba nalí. ³² Zoa Nu yúbölö Nu run ba nalí quia' neda', Lë' Xuza', ate' nözda' naca lesaca' le runë' ba nalí quia'. ³³ Libí'ili' gusól-la'li' bönni' yöjnábiguequinë' Juan, ate' lë na' benë' ba nalí quia' naca idútë li. ³⁴ Neda' bití' naquinda' nu bönni' gunë' ba nalí quia', pero ruá'a didza' caní para uláli'. ³⁵ Didza' bë'ë Juan na' gulaca ca tu guí' yöri, le guyegui, en buzení', ate' libí'ili', tu' chí'isö guyaza ládxi'li' uzí'ili' xibé bení' queë'. ³⁶ Na'a, zoa le run ba nalí quia' neda' le nácarö idú li ladxe' ca lë na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en nádagaca bë' gusól-lë'ë Dios Xuz neda'. ³⁷ Lësca' Dios Xuz nasól-lë'ë neda' runë' ba nalí quia'. Catu caz biyónili' chi'ë, en catu caz bilé'eli' lahuë', ³⁸ en cabí nazí' lu ná'ali' xtídzë'ë, tu' cabí réajlë'ëli' neda', Nu na' gusól-lë'ë. ³⁹ Rusédali' le nazúaj lu guichi lá'ayi, tu' réquili' huáta' yöl-la' na'bán idú queéli' ni'a que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'. ⁴⁰ Biti' ré'ënili' guídali' quia' neda' para gata' yöl-la' na'bán queéli'.

⁴¹ Biti' riguila' yöl-la' ba le ila'gú'u bönachi neda'. ⁴² Neda' núnbë'a libí'ili', en nözda' bití' nadxí'ili'-në' Dios. ⁴³ Bidxina' ni uláz queë' Dios Xuz, ate' libí'ili' bití' rizí' lu ná'ali' neda', pero channö huadxín nu yúbölö nu guídi rácasö que, si' lu ná'ali' nu na'. ⁴⁴ ¿Nacxi caz gaca tséajlë'ëli' Dios channö rizí'ili' yöl-la' run zxön que luzá'ali' tuli' ia'tuli', en bití' riguíljalí' yöl-la' run zxön na' za' lu në'ë la's dui Dios? ⁴⁵ Biti' uzóa ícjali' uzéguia' libí'ili' didza' lahuë' Xuza'. Nu na' uzegui libí'ili' didza' naca lë cazë' Moisés, bönni' na' ruzxöni ládxi'li'-në', sal-la' gútië' dza ni'te. ⁴⁶ La'tu' réajlë'ëli'-në' Moisés, tséajlë'ëli' ca' neda', tu' buzúajë' Moisés lu guichi ca naca quia' neda'. ⁴⁷ Na'a, ¿nacxi caz gaca tséajlë'ëli' didza' ruá'a neda' channö cabí réajlë'ëli' yugu' le buzúajë' Moisés lu guichi?

Rugahuë' Jesús zíanrö ca chi-un gayuá' bönachi

(Mt. 14:13-21; Mr. 6:30-44; Lc. 9:10-17)

6 ¹ Gudödi guca lë ni, guyijë' Jesús ia'tsölá'a Nísado' Que Galilea, nazí'i le ca' Nísado' Queë' Tiberias. ² Bönachi zían yöjnógaca Jesús tu' bila'lé'e yugu' yöl-la' huáca benë', cate' bunë' bönni' té'enë'. ³ Ní'irö gurenë' Jesús, guyijë' ga naca tu lu guí'ado', ga ni' guró'ölenë' yugu' bönni' usëda queë'. ⁴ Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁵ Cate' guchisa lahuë' Jesús, en bilé'enë' bönachi zían zá'gaca ga zoë', ní'irö rë' Felipe:

—¿Gazxi tsöj'ö'uru' yöta xtila le ilágugaca bönachi zían ni?

⁶ Caní gunné' Jesús para si' bë'ë Felipe na', tu' chinózinë' Lë' naca gunë'. ⁷ Bubi'ë didza' Felipe, rnnë':

—La'tu' sí'iru' yöta xtila len lázxjaru' que idú xunu' beo', biti' guequi láti'do' huéaj le ilágugaca bönachi zían ni.

⁸ Ní'irö tu bönni' usëda queë' Jesús, lë' Andrés, bóchë'ë Simón Pedro, rë' Lë', rnnë':

⁹ —Ni zóabi' tubi' bi'i bönni', nuá'abi' gayu' yöta xtila néquiguequini zxoá' cebada, en chópaba' böla cuídi'do'. ¿Naru' huéqui'tse ugagu le do' ni cate' xö bönachi?

¹⁰ Ní'irö Jesús rë' légaquië':

—Guli'gún ga ila'bó' bönachi zían ni lu yu.

Lataj na', ró'öda' daca', ate' gula'bö'ë idú ca chi-un gáyú'ë bönni' ni'.

¹¹ Ní'irö gudélë'ë Jesús yugu' yöta xtila na'. Cate' chigudxë' Dios: “Xclenu’”, gudísië' le quégaquië' bönni' usëda queë', ate' légaquië' gula'guísië' le quégaca yúgu'të nupa na' ró'gaca lu daca' ni'. Lësca' caní gulunë' quégacaba' böla cuídi'do' na', ate' gulahuë' tsca gulé'ënnë' ilahuë'. ¹² Cate' chibulu'huóljanë', Jesús gudxë' yugu' bönni' usëda queë', gunné':

—Buli'túbi le bizxaj nagá'anagaca, para cabí ilaca ditaj.

¹³ Bulu'tubë' ca', ate' bulu'lié' chinnu ga'bórado' yugu' le bizxaj quégaca gayu' yöta xtila néquiguequini zxoá' cebada na', le bulu'gá'ana quégaquië' bönni' na' gulahuë'. ¹⁴ Cate' bila'lé'enë' bönni' ni' yöl-la' huáca na' benë' Jesús, ta'nnë':

—Le nácatë bönni' ni náquië' bönni' na' ru'ë didza' uláz queë' Dios, bönni' na' ral-la' guídë' yödzölió ni.

¹⁵ Tu' réquibe'enë' Jesús té'ënnë' ila'ché'ë Lë' bayudxi para ilunë' ga inná bé'enë' légaquië', que lë ni na' buzé'ë ni', sa'yéajë' tuzë' tu lu guí'a.

Rizë'e ni'ë Jesús lu nísado'

(Mt. 14:22-27; Mr. 6:45-52)

¹⁶ Cate' chizá' ral-la, yójáquië' bönni' usëda queë' Jesús, ate' bila'dxinë' ra' nísado'. ¹⁷ Gula'benë' tu lë'e bárcodo' ni', en sójáquië' ta'dödë' lu nísado' na', para ulu'dxinë' Capernaum. Chinaca chul-la ate' Jesús biti' ridxíninë' ga na' nacu'ë. ¹⁸ Gusí lo recja bö' budunu' lu nísado' na', ate' riyasa ridxía nisa na'. ¹⁹ Cate' chibulu'sé'ë bárcodo' na', le guzá' le naca tsca rizá'aru' tu hórásö, ní'irö bila'lé'enë' Jesús rizë'e ni'ë lu nísado' na', en zë'ë ribíguë'ë ga na' zeaj barco na', ate' guladxi gula'dzöbinë'. ²⁰ Ní'irö Jesús rë' légaquië':

—Neda' caz ni. Biti' gádxili'.

²¹ Ní'irö len yöl-la' rudzeja quégaquië' bulu'guélë'ë Lë' lë'e bárcodo' na', ate' la' bidxintë bárcodo' na' lu yu bidxi ga ni' sójáquië'.

Bönachi zían tu'guilaj Jesús

²² Dza buropi ni', guléquibe'e bönachi zían na' nagá'anagaca ia'tsölá'a nísado' bidxín tuz bárcodo' ni', ate' Jesús biti' gurénlenë' yugu' bönni' usëda queë' lë'e bárcodo' na', pero légacasë' na' yójáquië'. ²³ Ní'irö bila'rúaj ia'bal-la bárcodo' lu yödzo Tiberias, ate' bila'dxín tu lataj le dë gála'sö ga ni' gulahuë' yöta xtila cate' ni' Xanru' Jesús gudxë' Dios: “Xclenu” que. ²⁴ Tu' bila'lé'enë' bíti'rö zoë' Jesús ni', en biti' nacu'ë bönni' usëda queë' ni', que lë ni na' gula'benë' lé'egaca bárcodo' na', ate' yójáquië' Capernaum, tu'guiljë' Jesús.

Náquië' Jesús yöta xtila nabánigaca tsaz bönachi

²⁵ Cate' bila'dxín bönachi zían na' ia'tsölá'a nísado' na', yöjxáca'gaquië' Jesús, en të' Lë':

—Bönni' Usedi, ¿bátaxi bidxinu' ni?

²⁶ Bubi'ë didza' Jesús, rë' légaquië':

—Le nácatë rea' libí'ili': Ruguílajli' neda', calëga tu' bilé'eli' yugu' yöl-la' huáca bena', pero tu' gudáguli' yöta xtila ni', en bójjali'.

²⁷ Guli'gún dxin, calëga para sí'ili' la' huagu ridödi que, pero para sí'ili' la' huagu na' ugá'anatica'sö, en runna yöl-la' na'bán idú. Lë ni naca la' huagu neda', Bönni' Guljë' Bönachi, gunna' queéli', tu' bulu'ë lahui Xuza' Dios naca' Zxí'inë'.

²⁸ Ní'irö gula'nábinë' Lë', ta'nnë':

—¿Bizxi run bayudxi guntu' para guntu' le raza ládxë'ë Dios?

²⁹ Bubi'ë didza' Jesús, rë' légaquië':

—Lë ni le raza ládxë'ë Dios, tséajlë'ëli' neda', naca' nu gusól-lë'ë Lë'.

³⁰ Ní'irö gula'nábinë' Lë', ta'nnë':

—¿Bizxi le naca bë' runu', le ilé'etu' para tséajlë'ëtu' Li'? ¿Bizxi yöl-la' huáca runu'? ³¹ Gulahuë' xuz gudödi queëru' yöta xtila nazi'i le maná lu

lataj cá'asö, ca nazúaj lu guichi lá'ayi, rnna: “Yöta xtila que yehua' yubá Moisés bë'ë quégaquië', gulahuë'.”

³² Bubi'ë didza' Jesús, rë' légaquië':

—Le nácatë rea' libí'ili': Calëga Moisés na' bennë' queéli' yöta xtila que yehua' yubá, pero Xuza' Dios runnë' queéli' yöta xtila le naca idú que yehua' yubá. ³³ Yöta xtila na' runnë' Dios quégaca bönachi naca' neda', lë na' birúaj yehua' yubá, en runödzej yöl-la' na'bán quégaca bönachi yödzölió ni.

³⁴ Ní'irö të' Lë':

—Xan, bénatica'sö queétu' yöta xtila na'.

³⁵ Jesús rë' légaquië':

—Neda' caz naca' yöta xtila nabánigaca tsaz bönachi. Nu za'len neda', huölaj udzë'e tsaz nu na' le naca queë' Dios, ate' nu tséajlë' neda', chinë'aj tsaz le naca queë' Dios. ³⁶ Naca ca na' chigudxi caza' libí'ili': “Sal-la' rilé'eli' neda', biti' ca' réajlë'ëli' neda'.” ³⁷ Yúgu'të nupa na' runnë' Xuza' quia', ídigaca quia', ate' nupa na' zaca quia', biti' usá'gaca'-në'. ³⁸ Caní naca, tu' bötja' birúaja' yehua' yubá, calëga para guna' ca ré'ënda' neda' caz, pero para guna' ca ré'ënë' Dios Xuz, nasól-lë'ë neda'. ³⁹ Lë ni le ré'ënë' Xuza' nasól-lë'ë neda', ré'ënë' cabí unítia' nitú nupa na' bennë' quia', pero usubana' léguequi dza údxi. ⁴⁰ Lë ni le ré'ënë' Dios Xuz nasól-lë'ë neda', ré'ënë' gata' yöl-la' na'bán quéguequi, yúgu'të nupa na' ila'lé'e neda', Zxí'inë', en ila'yéajlë' neda', ate' neda' usubana' léguequi dza údxi na'.

⁴¹ Ní'irö gula'nnë' queë' Jesús bönni' judío unná bë' tu' gunné': “Neda' caz naca' yöta xtila na' bötaj, birúaj yehua' yubá.” ⁴² Que lë ni na' ta'nnë':

—¿Naru' cabí bönni' ni Jesús, zxí'inë' José? Nunbë' cázaru' xuz xinë'ë. ¿Nacxi caz naca na', rnnë' bönni' ni: “Bötja' birúaja' yehua' yubá”?

⁴³ Ní'irö bubi'ë didza' Jesús, rë' légaquië':

—Biti' innëli' quia' la' libí'isili'. ⁴⁴ Biti' séqui'në' nitúë' bönni' guídë' quia' channö cabí idigu'ë quia' Xuza' nasól-lë'ë neda' nu na', ate' neda' usubana' nu na' dza údxi. ⁴⁵ Nazúaj lu guichi lá'ayi ca gula'nnë' bönni' gulu'ë didza' uláz queë' Dios, le rnna caní: Dios usédinë' yúgu'të bönachi. Que lë ni na', yúgu'të bönni' ta'yönnë' chi'ë Xuza', en nazédagaquië' lu në'ë Lë' zá'gaquië' quia'.

⁴⁶ Cuntu nu bönni' bilé'enë' Dios Xuz, pero tuzë' Bönni' na' birúajë' ga zoë' Dios. Bönni' ni rilé'e quézinë' Dios Xuz. ⁴⁷ Le nácatë rea' libí'ili': Núti'tës bönni' réajlë'ë neda' dë yöl-la' na'bán idú queë'. ⁴⁸ Neda' caz naca' yöta xtila nabánigaca tsaz bönachi. ⁴⁹ Gulahuë' xuz xtó'oli' yöta xtila na' nazí'i le maná lu lataj cá'asö, en cate' bizá'a dza quégaquië' gulatië'. ⁵⁰ Neda' naca' yöta xtila ruhuötaj rirúaj yehua' yubá, ate' núti'tës bönni' gahuë' le, biti' ca' gatië' bönni' na'. ⁵¹ Neda' caz naca'

yöta xtila na' nabánigaca bönachi, le bötaj birúaj yehua' yubá, ate' channö núti'tës bönni' gahuë' yöta xtila na', gaca bántica'së' bönni' na'. Yöta xtila na' runödzja' neda' naca xipéla'a, le runödzja' para gata' yöla' na'bán quégaca bönachi yödzölió.

⁵² Ní'irö bönni' judío unná bë' gula'chixi luzá'agaquië', ta'nnë':

—¿Naru' huácatsö bönni' ni gunnë' queëru' xipélë'ë le gáguru'?

⁵³ Que læ ni na' Jesús rë' légaquië':

—Le nácatë rea' libí'ili': Channö cabí gáguli' xipéla'a neda', Bönni' Guljë' Bönachi, en channö cabí guí'jali' xichöna', biti' ca' zóalen libí'ili' yöla' na'bán na'. ⁵⁴ Núti'tës nu gagu xipéla'a, en guí'aj xichöna', dë que yöla' na'bán idú, ate' neda' usubana' nu na' dza údxí. ⁵⁵ Caní gaca, tu' naca xipéla'a la' huagu idú, ate' xichöna' naca tu le naca idú para nu guí'aj le. ⁵⁶ Núti'tës bönni' gahuë' xipéla'a, en guí'jë' xichöna', sóaléntica'së' bönni' na' neda', ate' neda' sóaléntica'sa' læ'. ⁵⁷ Ca na' zoë' nabanë' Dios Xuz nasól-lë'ë neda', ate' neda' nabánida' Lë', læsca' caní ibáninë' neda' núti'tës bönni' gahuë' neda'. ⁵⁸ Lë ni yöta xtila bötaj birúaj yehua' yubá, en biti' naca ca yöta xtila na' nazí'i le maná, læ na' gulahuë' xuz xtó'oli', en cate' bizá'a dza quégaquië', gulátië'. Núti'tës bönni' gahuë' yöta xtila ni sóatica'së' ibanë'.

⁵⁹ Yugu' didza' ni bë'ë Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca læ ni tsanni ni' rusédinë' bönachi Capernaum.

Didza' rúnnagaca queëru' yöla' na'bán idú

⁶⁰ Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu në'e le?

⁶¹ Réquibe'enë' Jesús ta'nnë' bönni' usëda queë' que xtídzë'ë, ate' gunábinë' légaquië', rnnë':

—¿Naru' run didza' ni libí'ili' zi'? ⁶² ¿Nacxi caz gaca channö hualé'eli' neda', Bönni' Guljë' Bönachi, huëpa' huöja' ga ni' zoa' zí'alö? ⁶³ Le naca queë' Dios Bö' Lá'ayi naca le runna yöla' na'bán queéli'. Le naca béla'sö cuntú nu uzí' xibé. Didza' na' bé'lëna' libí'ili' náagaca queë' Dios Bö' Lá'ayi, en rúnnagaca yöla' na'bán quégaca bönachi. ⁶⁴ Na'a, bál-lali' biti' réajlë'ëli'.

Gunnë' caní Jesús tu' nózinë' dza ni'te nupa na' biti' ta'yéajlë', enca' nu na' udödi Lë' lu ná'agaquië' bönni' ilútië' Lë'. ⁶⁵ Que læ ni na' gunné':

—Que læ ni na' chigudxi caza' libí'ili': Biti' séqui'në' nitúë' bönni' të'ë neda' channö Dios Xuz cabí gu'ë læ' lataj.

⁶⁶ Dza na' gulaca chopa ládxi'gaquië' zían bönni' usëda queë', en bíti'rö gula'dálenë' Lë'. ⁶⁷ Ní'irö Jesús gunábinë' idxínnutë' bönni' usëda queë' na', rë' légaquië':

—¿Naru' ubíga'tsali' ca' libí'ili'?

⁶⁸ Bubi'ë didza' Pedro, rë' Lë':

—Xan, ¿nuzxi que tséajtu'? Li' napu' didza' rúnagaca queétu' yöl-la' na'bán idú. ⁶⁹ Netu' réajlë'ëtu' Li', en núnbë'ëtu' Li', nacu' Cristo na' nasól-lë'ë Dios, en nacu' ca' Zxí'inë' Dios ban.

⁷⁰ Bubi'ë didza' Jesús, rë' légaquië':

—Guró caza' libí'ili' chinnuli' ni, pero tuë' bönni' ládajli' libí'ili' dzaga tu' xihui' lë'.

⁷¹ Didza' ni bë'ë Jesús ca naca queë' Judas Iscariote, zxí'inë' tu bönni' lë' Simón, tu' náquië' Judas bönni' na' udödë' Jesús lu ná'agaquië' bönni' ilútië' Lë', en nabábalenë' ia'chinéajë' bönni' usëda queë' Jesús.

Bönni' böchi' cazë' Jesús biti' ta'yéajlë'ë Lë'

7 ¹ Gudödi guca lë ni ridé' Jesús luyú Galilea. Biti' gú'unnë' tsejë' luyú Judea tu' té'ënnë' bönni' judío unná bë' nacu'ë ni' ilútië' Lë'. ² Dza ni' chizóa idxín laní quégaquië' bönni' judío cate' tu'subanë' ca gula'cu'ë xuz xtó'ogaquië' znan libín lága'do'. ³ Que lë ni na' yugu' bönni' böché'ë Jesús gulé' Lë', ta'nné':

—Birúaj ni, en guyéaj luyú Judea para ila'lé'enë' ca' bönni' usëda quiu' nacu'ë ni' yugu' yöl-la' huáca runu'. ⁴ Channö ré'ënnë' nu bönni' ilúnbë'e bönachi lë', biti' runë' bagáchi'sö le runë'. Tu' runu' yugu' yöl-la' huáca caní, buluí'i cuinu' lógaca yúgu'të bönachi.

⁵ Caní gula'nnë', tu' cabí ta'yéajlë'ë bönni' böché'ë Jesús Lë'. ⁶ Ní'irö Jesús rë' légaquië':

—Biti' ridxini dza quia' para uluí'i lahua' lógaca bönachi, pero dza queé'li' tséajli' ni' chizóa caz. ⁷ Bönachi yödzölió ni biti' tu'zóa libí'ili' tsölá'alö, pero tu'zóa neda' tsölá'alö tu' runa' ba nalí quégaquië', rnnía' naca xihui' le tunë'. ⁸ Guli'tséaj libí'ili' laní na'. Biti' tseja' laní na' na'a tu' biti' ridxini dza quia'.

⁹ Cate' chigudxë' légaquië' lë ni, bugá'anë' luyú Galilea.

Sa'yéajë' Jesús laní quégaca bönachi judío

¹⁰ Gudödi sôjáquië' bönni' böché'ë Jesús laní na', ní'irö sa'yéajë' ca' Lë', calëga yálajdo', pero bagáchi'sö sa'yéajë'. ¹¹ Ga na' raca laní na', bulu'guiljë' bönni' judío unná bë' Jesús, ta'nné':

—¿Gazxi zoë' bönni' na'?

¹² Bönachi zían ni' gulu'í'ida' didza' ca naca queë' Jesús. Bal-lë' ta'nné':

—Náquië' dxi'a.

Ia'bal-lë' ta'nné':

—Biti' náquië' dxi'a tu' rizí' yé'enë' bönachi.

¹³ Biti' bë'ë nitúë' bönni' didza' yálajdo' ca naca queë' Jesús, tu' tadxi bönachi zían na' le ilunë' yugu' bönni' judío unná bë'.

¹⁴ Cate' chibidxín gatsaj laní na', blë'ë Jesús ra' yudo', en busédinë' bönachi nacuá' ni'. ¹⁵ Bulu'bánninë' bönni' judío, ta'nné':

—¿Nacxi caz naca, rácadë'ë bönni' ni, en biti' ca' nazëdë' que yudo'?

¹⁶ Bubi'ë didza' Jesús, rë' légaquië':

—Le rusédida' neda', calëga quia' naca, pero queë' Dios Xuz na' nasól-lë'ë neda'. ¹⁷ Channö ré'ënë' nu bönni' gunë' ca ré'ënë' Dios, huéquibe'enë' bönni' na' channö nequi queë' Dios le rusédida' bönachi o channö rácasö quia' ruá'a didza'. ¹⁸ Nu bönni' ru'ë didza' rácasö queë', runë' caní para ilún bal bönachi lë', pero Bönni' na' ré'ënë' ilún bönachi bal Nu nasól-la' lë', Bönni' ni ru'ë didza' idútë li, en biti' ca' rizí' yë'ë.

¹⁹ 'Moisés bennë' queéli' xibá queë' Dios, pero biti' runli' ca rinná bë' xibá na'. ¿Bizx que rizóa ribó'öli' gútili' neda'?

²⁰ Bulu'bí'i didza' bönachi zían na', të Lë':

—Tu' xihui' dzaga li'. ¿Nuzxi caz rizóa ribó'ö guti li'?

²¹ Bubi'ë didza' Jesús, rë' légaquië':

—Tu yöl-la' huáca bena', ate' rubánili' yúgu'tëli'. ²² Le nácatë Moisés bennë' queéli' lë na' narugu lu xipéla'li' le naca bë', pero calëga Moisés caz bennë' queéli' lë na', pero guzxi'ë le lu ná'agaquië' xuz xtá'ahuë'. Na'a, sal-la' naca dza lá'ayi, richúguli' lu xipéla'gacabi' bi'i bönni'do' lë na' naca bë' néquiguequibi' queë' Dios. ²³ Channö ta'z'í'ibi' lu xipéla'gacabi' lë na' naca bë' cate' naca dza lá'ayi, para cabí quítsjali' xibá queë' Moisés, ¿naru' rilétseli' neda' tu' buna'-në' tu bönni', ate' böáquië' dxí'ado' cate' naca dza lá'ayi? ²⁴ Biti' ral-la' uchi'a usöró lízili' ca', pero buli'chi'a buli'söró ca naca le naca idútë li.

Riguíxjö'ë Jesús ga narúajë'

²⁵ Ní'irö gulu'ë didza' bal-lë' bönni' nacu'ë Jerusalén, ta'nné':

—¿Naru' calëga bönni' ni Nu na' tu'guiljë' bönni' judío unná bë' para ilútië' Lë'? ²⁶ Buli'yútsöca', yálajdo' ru'ë didza', en biti' bi të' Lë'. ¿Naru' téquibe'enë' bönni' ta'nná bé'enë' rë'u, le nácatë bönni' ni náquië' Cristo, Nu na' ral-la' inná be'e rë'u? ²⁷ Bönni' ni, nöz quéziru' gazxi bönni' Lë'. Cate' guídë' Cristo, cuntú nu inözi gazxi bönni' Lë'.

²⁸ Ni' zoë' Jesús rusédinë' bönachi chila yudo', en cate' biyönnë' didza' ni, ní'irö bë'ë zidzaj didza', rnnë':

—¿Naru' núnbe'etseli' neda', en nözitseli' gazxi bönni' neda'? Bida' ni, calëga rácasö quia', pero Dios caz nasól-lë'ë neda', ate' Lë', biti' núnbë'ëli'-në' libí'ili'. ²⁹ Neda' núnbe'eda'-në', tu' za'a queë' Lë', ate' Lë' cazë' nasól-lë'ë neda'.

³⁰ Ní'irö gulunë' bayudxi ila'zönë' Lë', pero cuntú nu guzxón Lë', tu' cabí ridxini dza queë' tsu'ë lu ná'agaquië'. ³¹ Gula'yéajlë' zían bönachi ni' Lë', ta'nná:

—Cate' guídë' Cristo, ¿naru' gunë' zíanrö yöl-la' huáca ca le runë' bönni' ni?

Bönni' yudo' ta'sól-lë'ë nupa ila'zón Jesús

³² Bila'yönnë' bönni' yudo' fariseo yugu' didza' ni tuí'i bönachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'sól-lë'ë ni'a ná'agaquië' para tsöjxóngaqië' Lë'. ³³ Ní'irö Jesús gunné':

—Ia'tú chí'isö sóalena' libí'ili', ate' ní'irö huöja' ga zoë' Xuza' nasól-lë'ë neda'. ³⁴ Uguíljalí' neda', pero bití' udzólili' neda'. Ga ni' tsöjsóa' neda' bití' gaca guídali' libí'ili'.

³⁵ Ní'irö të' luzá'agaquië' bönni' judío, ta'nnë':

—¿Gazxi tséajtsë' bönni' ni, ga ni' bití' udzóliru'-në'? ¿Naru' huayéajtsë' ga nacu'ë bönni' judío násilasigaquië' idútë yödzölió, en usédinë' yugu' bönni' zi'tu' ni'? ³⁶ ¿Bizxi ré'ëni inná didza' na' bë'ë: “Uguíljalí' neda', pero bití' udzólili' neda'”, enca': “Ga ni' tsöjsóa' neda' bití' gaca guídali' libí'ili'”?

Nisa yegu le runna yöl-la' na'bán queéru'

³⁷ Cate' ni' naca dza údxi que laní na', dza na' naca lo, guzuínë' Jesús, en bë'ë zidzaj didza', rnnë':

—Channö zoë' nu bönni' ribidxi icja ládxi'da'ahuë', ral-la' guídë' bönni' na' ga zoa', en guí'jë'. ³⁸ Nu bönni' réajlë'ë neda', gaca queë' ca na' nazúaj lu guichi lá'ayi, rnná: Lu icja ládxi'da'ahuë' bönni' na' ilén le naca ca nisa yegu, lë na' ulu'zí' xibé bönachi, gata' yöl-la' na'bán quéguequi.

³⁹ Didza' ni bë'ë Jesús ca naca queë' Dios Bö' Lá'ayi, Nu ral-la' idisóalen bönni' na' ila'yéajlë'ë Jesús. Caní gunné' Jesús tu' cabí ridxíninë' Dios Bö' Lá'ayi, tu' cabí ruhuépinë' Jesús ga tsépisëtërë'.

Ta'ruáj choplö bönachi

⁴⁰ Cate' bila'yöni didza' ni, gula'nná bal-la bönachi zían na', ta'nná:

—Le nácatë Bönni' ni náquië' Bönni' na' ru'ë didza' uláz queë' Dios, Bönni' na' guzxí' lu në'ë Dios isól-lë'ë queéru'.

⁴¹ Ta'nnë' ia'bal-lë':

—Bönni' ni náquië' Cristo.

Ta'nná bal-la bönachi:

—¿Naru' irúajtsë' Cristo luyú Galilea? ⁴² Nazúaj lu guichi lá'ayi le rnná: “Cristo galjë' ladaj di'a dza queë' David, en gáquië' ca' bönni' Belén le guca ladzë' David na'.”

⁴³ Caní guca, bila'ruáj bönachi na' choplö tu' nózinë' Jesús. ⁴⁴ Té'ënnë' bal-lë' ila'zönë' Jesús, pero cuntú nu bi ben queë'.

Biti' ta'yéajlë'ë Jesús bönni' unná bë'

⁴⁵ Ní'irö bulu'dxinë' ni'a ná'agaquië' yugu' bixúz unná bë', en yugu' bönni' yudo' fariseo ga na' naculé bönni' yudo' na', ate' légaquië' gulé' ni'a ná'agaquië' na', ta'nné':

—¿Bizx que bití' diché'ëli'-në'?

⁴⁶ Bulu'bi'ë didza' ni'a ná'agaquië', ta'nné':

—Cuntu nu bönni' ru'ë didza' ca ru'ë didza' Bönni' ni.

⁴⁷ Ní'irö bulu'bi'ë didza' bönni' yudo' fariseo na', ta'nné':

—¿Naru' bé'tsali' lataj guzxí' yé'enë' ca' libí'ili'? ⁴⁸ ¿Naru' guyéajlë'tsë' Lë' nu bönni' unná bë' o nu bönni' yudo' fariseo? ⁴⁹ Libí'ili' dxíali' dö' tu' cabí rácali' xibá queë' Dios.

⁵⁰ Zoë' ca' Nicodemo ni', bönni' na' bidxinë' ga zoë' Jesús chi'i dzó'ölö, tu' náquië' ca' bönni' yudo' fariseo, ate' rë' légaquië':

⁵¹ —¿Naru' richúguru' queë' tu bönni' gátië' lu xibá queëru' channö cabí yóniru' lë' zí'alö para inóziru' bi benë'?

⁵² Ní'irö bulu'bi'ë didza' ia'zíca'rë' na', të' lë':

—¿Nácatso' ca' li' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitué' bönni' ru'ë didza' uláz queë' Dios luyú Galilea.

⁵³ Ní'irö yöjhuójgaquië' lidxi que queégaquië'.

8 ¹ Guyijë' Jesús ga naca lu Guí'a Yaga Olivo.

Nigula naguítsjanu xibá que yöl-la' nutsaga na'

² Cate' za' rení' budxinë' Jesús ra' yudo', ate' bila'dxín yúgu'të bönachi ga zoë'. Gurö'ë Jesús, rusédinë' légaquië'. ³ Ní'irö yugu' bönni' yudo' usedi, en yugu' bönni' yudo' fariseo duché'ëgaquië'-nu tu nigula ga zoë' Jesús, tu' gula'dzólinë'-nu ni' riguítsjanu xibá que yöl-la' nutsaga na'. Bulu'sudxinë'-nu lógaca bönachi na' tu'zé náagagaca Jesús, ⁴ ate' të' Lë':

—Bönni' Usedi, nigula ni guzxöntu'-nu ni' runnu dul-la' riguítsjanu xibá que yöl-la' nutsaga na'. ⁵ Lu xibá queë' Moisés, gunná bé'enë' netu' uládxí'tu'-nu guió'j nu nigula runnu caní, para gátinu. ¿Názxiga Li', nacxi rnno'?

⁶ Caní gula'nné' para ila'zí' bë'ë Jesús para ila'zéqui'në' ulu'zéguië' Lë' didza'. Ní'irö biyéchuë' Jesús, ruyúë' lu yu, en ruzúajë' lu yu na' len xibón në'ë. ⁷ Cate' gula'nábide'enë' Lë', ní'irö buzuínë' Jesús, en rë' légaquië':

—Núli' cabí nunli' dul-la' isí loli' uládxí'li'-nu guió'j.

⁸ Leyúbölö biyéchuë' Jesús, ruyúë' lu yu, en bugué'ë' ruzúajë' leyúbölö lu yu na'. ⁹ Cate' bila'yönnë' didza' ni, bulu'xösa ládxi'do'gaquië' légaquië', ate' bila'rúajë' tu tuë'. Gula'sí lógachië' bönni' gúlarö ga bidxintë bönni' cuidi'. Nagá'anë' Jesús ni', dzáganu

nigula na' Lë' gatsaj láhui'lö nupa na' tu'zé nágagaca Lë'. ¹⁰ Ní'irö buzuínë' Jesús leyúbölö, en cuntu nu bilé'enë' nu ruzegui lënu didza', pero túzinu nigula na', ate' rë'ë-nu:

—Nigúla, ¿gazxi nacuá' nupa na' bulu'zegui li' didza'? ¿Naru' cabí zoa nu bönni' richúguië' quiu'?

¹¹ Lënu rnnanu:

—Cuntu nu caz, Xan.

Ní'irö Jesús rë'ë-nu:

—Lëzca' neda', biti' richuga' quiu'. Böaj lidxu', en bíti'rö gunu' dul-la'.

Náquië' Jesús bení' quégaca bönachi yödzölió

¹² Leyúbölö Jesús bé'lenë' bönachi didza', rnnë':

—Neda' naca' bení' quégaca bönachi yödzölió. Nu bönni' zá'lenë' neda', biti' të' ga naca chul-la que dul-la', pero tu bení' sóalen bönni' na' le uluí'i lë' naca gata' yöl-la' na'bán idú queë'.

¹³ Ní'irö të' Lë' bönni' yudo' fariseo, ta'nnë':

—Li' runu' ba nalí que la' cuinsu'. Biti' naca lesaca' le runu' ba nalí. Nítisö naca.

¹⁴ Bubi'ë didza' Jesús, rë' légaquië':

—Sal-la' runa' ba nalí que la' cuinsa', idútë li naca le runa' ba nalí, tu' nözda' ga birúaja', en ga tseja', pero libí'ili' biti' nózili' gazxi za'a, en calëga gazxi tseja'. ¹⁵ Libí'ili' ruchi'a rusöröli' ca nácagaca le taca yödzölió ni, pero neda', rácasö quia' cuntu nu bönni' ruchi'a rusöróa' queë'. ¹⁶ La'tu' uchi'a usöróa', ca nácatë uchi'a usöróa', tu' calëga néda'sö uchi'a usöróa', pero Xuza' nasöl-lë'ë neda' gunë' neda' tsözxón. ¹⁷ Lësca' caní lu xibá queë' Moisés nazúaj lu guichi le rnna: Le tunë' ba nalí chopë' bönni', idútë li naca. ¹⁸ Neda' runa' ba nalí que la' cuinsa', ate' Xuza' nasöl-lë'ë neda', runë' ca' ba nalí quia'.

¹⁹ Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lësca' Xuza' gúnbë'ëli'-në'.

²⁰ Yugu' didza' ni bè'ë Jesús cate' ni' zoë' rusédinë' bönachi lu chila yudo', ga na' nacuá' guí'ina gapa ta'gu'ë gun que yudo', pero cuntu nu guzxón Lë', tu' cabí ridxini dza queë' tsu'ë lu ná'agaquië'.

Rnnë' Jesús: “Ga tseja' neda', biti' gaca guídali”

²¹ Leyúbölö Jesús rë' légaquië', rnnë':

—Uzá'a yödzölió ni, ate' uguíljalí' nu usölá libí'ili', pero ugá'ana dul-la' nabága'li', en gátili'. Ga tseja' neda', biti' gaca guídali'.

²² Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': "Ga tseja' neda', libí'ili' biti' gaca guídali'."

²³ Jesús rë' légaquië':

—Libí'ili' nácali' que luyú dë cadxí'ilö ni, pero neda' za'a yehua' yubá xitsá'. Libí'ili' nácali' bönachi yödzölió ni, pero neda' biti' naca' bönni' yödzölió ni. ²⁴ Que lë ni na' gudxa' libí'ili': Ugá'ana dul-la' nabága'li', en gátili'. Channö cabí tséajlë'ëli' naca caza' Nu usölá, ugá'ana dul-la' nabága'li', en gátili'.

²⁵ Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' libí'ili' dza ni'te. ²⁶ Zián le ral-la' guía' libí'ili', en uchi'a usöró'a le naca queé'li'. Didza' idútë li ru'ë Xuza' nasól-lë'ë neda', ate' didza' riyönda' ru'ë Lë', ruí'ilená' bönachi yödzölió ni.

²⁷ Biti' gula'yéajni'inë' ruí'ilenë' légaquië' didza' ca naca queë' Dios Xuz. ²⁸ Que lë ni na' Jesús rë' légaquië':

—Cate' idxín dza uchísali' neda', Bönni' Guljë' Bönachi, gútili' neda', ní'irö guéquibe'eli' naca caza' Nu rusölá, en biti' bi runa' rácasö quia', pero ca na' ruluí'inë' Xuza' neda', ca' ruá'a didza'. ²⁹ Xuza' nasól-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxë'ë Lë'.

³⁰ Cate' bë'ë Jesús didza' ni, bönni' zián gula'yéajlë'ë Lë'.

Nupa nádagaca zxí'inë' Dios, en nupa nadzúngaca lu na' dul-la'

³¹ Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rnna xtídza'a, gácali' idú bönni' usëda quia'.

³² Gúnbë'ëli' le naca idútë li, ate' le naca idútë li na' usölá libí'ili'.

³³ Bulu'bi'ë didza', të' Lë':

—Abraham naquië' xuz gudödi queëtu', en cuntú nu ben netu' bönni' nadó'ogaca. ¿Rnnatso': "Usölá libí'ili'?"

³⁴ Jesús rë' légaquië':

—Le nácatë rea' libí'ili': Yúgu'të nupa tun dul-la', nadzúngaca lu na' dul-la'. ³⁵ Nu naca bönni' nadó'o biti' ugá'anatica'sö lidxë' xan yu'u, pero nu naca zxí'inë' xan yu'u na' rugá'anatica'sö lidxi nu na' naca xan yu'u. ³⁶ Caní naca, channö Nu na' naca Zxí'inë' Dios usölá libí'ili', le nácatë uláli'. ³⁷ Nözda' naquië' Abraham xuz gudödi queëli', pero rizó'a ribó'öli' gútili' neda', tu' cabí nazí' lu ná'ali' xtídza'a. ³⁸ Neda' ruá'a didza' ca naca le bilé'eda' ga na' zoë' Xuza', pero libí'ili' runli' le biyónili' ga zoa xuz quézili'.

³⁹ Bulu'bi'ë didza', të' Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú zxí'ini xi'sóe' Abraham, gunli' ca na' benë' Abraham. ⁴⁰ Na'a, rizóa ribö'öli' gútili' neda', sal-la' ruí'ilena' libí'ili' didza' idútë li, didza' na' biyönda' bënë Dios. Biti' benë' Abraham caní. ⁴¹ Libí'ili' runli' ca run xuz quézili'.

Ní'irö të' Lë':

—Netu' biti' ca' nácatu' bi'i lando'. Tuzë' Dios náquië' Xuztu'.

⁴² Ní'irö Jesús rë' légaquië':

—La'tu' náquië' Dios idú Xúzili', huadxí'ili' neda', tu' birúaja' neda' ga zoë' Dios, en bida' luyú ni, ate' calëga rácasö quia' bida', pero Dios caz gusól-lë'ë neda'. ⁴³ ¿Bizx que biti' gaca tséajni'ili' didza' ruá'a? Naca tu' cabí ré'ënili' uzé nágali' xtídza'a. ⁴⁴ Xuz quézili' naca tu' xihui'. Néquili' que tu' xihui', en ré'ënili' gunli' le rizé ladxi' xúzili' na'. Dza ni'te naca tu' xihui' nu guti bönachi, en cabí nazí' lu në'e le naca idútë li, tu' cabí ruí'i didza' idútë li. Cate' rizí' yë' tu' xihui', ca naca caz ruí'i didza', tu' naca nu rizí' yë', en naca ca xúzgaca caz nupa ta'zí' yë'. ⁴⁵ Tu' ruá'a neda' didza' idútë li biti' réajlë'ëli' neda'. ⁴⁶ ¿Núzxilöli' gaca usubága'li' neda' dul-la'? Channö ruá'a didza' idútë li, ¿bizx que biti' réajlë'ëli' neda'? ⁴⁷ Nu naca queë' Dios, ruzé nagui xtídzë'ë Dios, pero libí'ili', tu' cabí nácali' queë' Dios, biti' ruzé nágali' xtídzë'ë.

Cristo zoa cazë' zí'atëlö ca Abraham

⁴⁸ Ní'irö bulu'bi'ë didza' yugu' bönni' judío, të' Jesús:

—Catëz gunnatu' cate' gunnatu' nacu' bönni' Samaria, ate' dzaga tu' xihui' Li'.

⁴⁹ Bubi'ë didza' Jesús, rë' légaquië':

—Biti' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsölá'alö. ⁵⁰ Biti' runa' zxön cuina'. Zoa Nu run zxön neda', ate' Lë' ruchi'a rusöröë' rë'u. ⁵¹ Le nácatë rea' libí'ili': Nu bönni' si' lu në'ë xtídza'a, biti' ca' gátië' bönni' na'.

⁵² Ní'irö yugu' bönni' judío na' të' Lë', ta'nnë':

—Na'a réquibe'etu' dzaga tu' xihui' Li'. Abraham gútië', ate' gulátië' ca' bönni' gulu'ë didza' uláz queë' Dios, pero Li' rnno': “Nu bönni' si' lu në'ë xtídza'a, biti' ca' gátië' bönni' na'.” ⁵³ ¿Naru' nácatërötso' Li' zxön ca xúziru' Abraham? Gútië' lë', ate' gulátië' ca' bönni' gulu'ë didza' uláz queë' Dios. ¿Nuzxi caz run cuinu'?

⁵⁴ Bubi'ë didza' Jesús, rë' légaquië':

—Channö neda' guna' zxön cuina', yöl-la' zxön na' biti' bi gaca. Xuza' runë' neda' zxön, ate' libí'ili' rnnali' náquië' Dios queé'li'. ⁵⁵ Libí'ili' biti' núnbë'ëli'-në' Dios Xuz, pero neda' núnbë'a-në'. La'tu' innía': Biti' núnbë'a-në', gaca' nu rizí' yë' ca na' nácali' libí'ili', rizí' yé'ëli'. Na'a, le nácatë núnbë'a-në', en nazí' lu na'a xtídzë'ë. ⁵⁶ Xúzili' Abraham budzéjanë' tu' ral-la' ilé'enë' dza soa' yödzölió ni, en sal-la' gútië' dza ni'te, bilé'enë' le, en budzéjade'enë'.

⁵⁷ Ní'irö yugu' bönni' judío na' të' Jesús, ta'nné':

—Biti' yuí'ínu' chi-un iz. ¿Naru' bilé'etsenu' Abraham?

⁵⁸ Jesús rë' légaquië':

—Le nácatë rea' libí'ili': Zí'atëlö ca soë' Abraham, neda' zoa caza'.

⁵⁹ Ní'irö gula'guélé'ë guió'j para ulu'ladxë' Jesús, pero Lë' bunítitë cuinë', en burúajë' lö'a yudo' na'. Gudödë' gatsaj láhui'lö ga na' nacué', ate' söhuó'jë'.

Ruúnë' Jesús tu bönni' guljë' nachúl-latë lahuë'

9 ¹ Cate' gudödë' Jesús tu lataj, bilé'enë' tu bönni' ni' guljë' nachúl-latë lahuë'. ² Gula'nábinë' Jesús bönni' usëda queë', ta'nné':

—Bönni' Usedi, ¿nuzxi ben dul-la'? ¿Naru' bönni' ni o xuz xiné'ë tu' guljë' nachúl-latë lahuë'?

³ Bubi'ë didza' Jesús, rë' légaquië':

—Biti' naca tu' benë' dul-la' bönni' ni, en calëga tu' gulunë' dul-la' xuz xiné'ë, pero naca para ilá' lahui yöl-la' huáca queë' Dios ni'a queë' bönni' ni. ⁴ Run bayudxi gunru' xichinë' Xuza' nasól-lë'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cuntun gaca gun dxin. ⁵ Tsanni ni zoa' yödzölió ni, naca' bení' quégaca bönachi yödzölió.

⁶ Cate' Jesús budxi bë'ë didza' ni, gurú'unë' zxöna' lu yu, en benë' gúna'do' len zxöna' na', ate' bugu'ë guna' na' guió'j lahuë' bönni' na' nachul-la lahuë'. ⁷ Ní'irö rë' lë':

—Guyéaj yójtibi lo' lu beaj nisa nazí'i le Siloé.

Siloé naca tu didza' hebreo le rnna: Nasöl-la'.

Ní'irö bönni' na' nachul-la lahuë' guyijë' ni', yójtibi lahuë'. Cate' buzé'ë ni' chirilé'enë'. ⁸ Ní'irö bulu'bani bönachi dzaga yu'u queë', en nupa ni' bila'lé'e lë' zí'atëlö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzej queë'?

⁹ Bal-lë' ta'nné':

—Lë' na'.

Ia'bal-lë' ta'nné':

—Calëga lë', pero ca rna' lahuë' bönni' na', rna' lahuë' ca' bönni' ni.

Lë' rnnë':

—Neda' na'.

¹⁰ Ní'irö gula'nábinë' lë', ta'nné':

—¿Nacxi caz guca, gyalaj guió'j lo'?

¹¹ Bubi'ë didza', rë' légaquië':

—Bönni' na' lë' Jesús benë' gúna'do', ate' gudëbë' gúna'do' na' guió'j lahua', en gudxë' neda': “Guyéaj ra' beaj nisa nazí'i le Siloé, yójtibi lo'.” Guyija' ni', yójtibi lahua', ate' gyalajtë guió'j lahua'.

¹² Ní'irö gula'nábinë' lë', ta'nné':

—¿Gazxi zoë' bönni' na'?

Lë' rë' légaquië':

—Biti' nözda'.

Yugu' bönni' yudo' ta'náb yúdxinë' bönni' na' gualaj guiój lahuë'

¹³ Ní'irö gula'ché'ë bönni' na' zí'alö nachul-la lahuë', en bulu'sudxinë' lë' lógaquië' bönni' yudo' fariseo. ¹⁴ Tu' naca dza lá'ayi quégaquië' cate' benë' Jesús gúna'do' na', en gusaljë' guiój lahuë' bönni' na' zí'alö nachul-la lahuë', ¹⁵ que lë' ni na' yugu' bönni' yudo' fariseo na' gula'nábinë' lë' leyúbölö nacxi guca gualaj guiój lahuë'. Lë' gudxë' légaquië':

—Budxië' gúna'do' guiój lahua', ate' yöjtiba' le, en rilé'eda'.

¹⁶ Ní'irö gulu'ë didza' bal-lë' bönni' yudo' fariseo na', ta'nné':

—Biti' nasöl-lë' Dios bönni' na', tu' cabí rapa chi'ë dza lá'ayi.

Ia'bal-lë' ta'nné':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'?

Caní guca, bila'ruájë' choplö. ¹⁷ Leyúbölö gula'nábinë' bönni' na' zí'alö nachul-la lahuë', ta'nné':

—¿Bizxi rnno' li' queë' bönni' na', gusaljë' guiój lo'?

Lë' rnnë':

—Náquië' bönni' ru'ë didza' uláz queë' Dios.

¹⁸ Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en gualaj guiój lahuë', cate' bulu'lídzarë' xuz xinë'ë bönni' na' gualaj guiój lahuë', ¹⁹ ate' gula'nábinë' légaquië', ta'nné':

—¿Naru' náquië' bönni' ni zxí'inili', rnnali' guljë' nachúl-latë lahuë'? ¿Nacxi caz naca rilé'enë' na'a?

²⁰ Bulu'bi'ë didza' xuz xinë'ë na', të' légaquië':

—Nóztu' bönni' ni náquië' zxí'initu', en guljë' nachúl-latë lahuë',

²¹ pero nacxi guca, rilé'enë' na'a, biti' nöztu', en nuzxi na' gusalaj guiój lahuë', biti' nöztu'. Guli'nabi-në' lë', tu' chináquië' bönni' chinaca. Lë' cazë' quíxjö'ë.

²² Caní gula'nné' xuz xinë'ë bönni' na' zí'alö nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'sëdë' queë' Dios. ²³ Que lë' ni na' gula'nné' xuz xinë'ë: “Guli'nabi-në' lë', tu' chináquië' bönni' chinaca.”

²⁴ Ní'irö yugu' bönni' judío unná bë' bulu'lidzë' leyúbölö bönni' na' zí'alö nachul-la lahuë', ate' të' lë':

—Ni'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

²⁵ Ní'irö bubi'ë didza', rnnë':

—Channö náquië' bönni' dul-la' biti' nözda'. Tu le nözda'. Zí'alö nachul-la lahua', ate' na'a rilé'eda'.

²⁶ Gula'nábinë' lë' leyúbölö, ta'nné':

—¿Bizxi benë' quiu'? ¿Nacxi benë' gusaljë' guió'j lo'?

²⁷ Bubi'ë didza', rë' légaquië':

—Chigúdxí caza' libí'ili', pero biti' gú'unili' si' lu ná'ali' xtídza'a. ¿Bizx que na' ré'ënili' yónili' leyúbölö? ¿Naru' ré'ënili' tá'ali' ca' Lë'?

²⁸ Ní'irö bulu'lidza zi'ë lë', ta'nné':

—Li' do'o Lë', pero netu' dá'atu' Moisés. ²⁹ Netu' nöztu' Dios bé'lenë' Moisés didza', pero ca naca queë' bönni' ni, biti' nöztu' nuzxi caz gusöl-la' Lë'.

³⁰ Ní'irö bubi'ë didza' bönni' na', rë' légaquië':

—Lë' ni run ga rubánida'. Libí'ili' biti' nózili' nuzxi gusöl-la' bönni' ni, ate' Lë' gusaljë' guió'j lahua'. ³¹ Nóziru' biti' riyönnë' Dios yugu' bönni' dul-la', pero channö reaj ládxë'ë tu bönni' Dios, en runë' ca ré'ënë' Lë', Dios riyönnë' bönni' ni. ³² Dza ni'te biti' riyón nu gunná channö nu bönni' gusaljë' guió'j lahuë' tu bönni' guljë' nachúl-latë lahuë'. ³³ La'tu' cabí náquië' bönni' ni queë' Dios, biti' bi gaca gunë'.

³⁴ Ní'irö bulu'bi'ë didza', të' lë':

—Ca gulju' naca bë' nabágu'u dul-la'. ¿Naru' li' ruséditsenu' netu'? Ní'irö bulu'béajë' lë' ní'ilö.

Nupa nácagaca chul-la niti

³⁵ Biyönnë' Jesús ca gulunë' bönni' judío unná bë', bulu'béajë' bönni' na' zí'alö nachul-la lahuë'. Cate' budzáguë' lë', gudxë' lë':

—¿Ba réajlë'u Zxí'inë' Dios?

³⁶ Bubi'ë didza' lë', rë' Jesús:

—¿Nuzxi na', Xan, para tséajlë'a Lë'?

³⁷ Jesús rë' lë':

—Chibilé'enu' Lë', ate' neda' ni ruí'ilena' li' didza', naca' Zxí'inë' Dios.

³⁸ Ní'irö bönni' na', gyalaj guió'j lahuë', guyéaj ládxë'ë Jesús, en rë' Lë':

—Xan, réajlë'a Li'.

³⁹ Jesús rnnë':

—Para uchi'a usöró'a' bönachi bida' yödzölió ni, para ulu'lé'e nupa nachul-la nanítigaca, en ilaca ca nu nachul-la lahui nupa téquiguequi ta'lé'e.

⁴⁰ Cate' yugu' bönni' yudo' fariseo na' nacuá'lenë' Jesús bila'yönnë' didza' ni, ní'irö të' Lë':

—¿Naru' nachul-la nanítitsatu'?

⁴¹ Bubi'ë didza' Jesús, rë' légaquië':

—La'náru' nachúl-lasö guió'j loli', biti' ibága'li' dul-la'. Na'a rnnali':
“Rilé'etu'.” Que lë ni na' nabága'li' dul-la'.

Rucúdzu'ë didza' Jesús que lë'a quégacaba' bö'cu' zxila'

10 ¹ Gunné' ca' Jesús:
—Le nácatë rea' libí'ili': Nu bönni' biti' razië' saca' ga nu riyaza lë'a quégacaba' bö'cu' zxila', pero tsázië' saca' ga yúbölö, bönni' ni náquië' gubán, en ribán cazë'. ² Nu bönni' razië' saca' ga nu riyaza náquië' bönni' run chi'i cazë' bö'cu' zxila' na'. ³ Para tsázië' bönni' ni, risalaj nu zoa run chi'i ga nu riyaza, ate' ta'yóniba' bö'cu' zxila' na' chi'ë, en tu'únbë'ëba'-në'. Lë' rulidzë'-ba' que queéba' ca légacaba', en rubéajë' yugu' bö'cu' zxila' na'. ⁴ Cate' chinubéajë'-ba' yúgu'tëba' bö'cu' zxila' néquigacaba' queë', röjnórüë' lógacaba', ate' bö'cu' zxila' na' röjnógacaba' lë', tu' tu'únbë'ëba' chi'ë. ⁵ Bönni' yúbölö biti' tsöjnógacaba' lë', pero ulu'zxúnnajba' queë', tu' cabí núnbë'gacaba' chí'igaquië' bönni' yúbölö.

⁶ Le rucudzu' didza' ni gudxë' Jesús légaquië', pero biti' gula'yéajni'inë' lë na' rë' légaquië'.

Náquië' Jesús ca bönni' rapa chi'ë-ba' bö'cu' zxila'

⁷ Ní'irö Jesús rë' légaquië' leyúbölö, rnnë':
—Le nácatë rea' libí'ili': Neda' naca' ca tu ga ta'yázaba' bö'cu' zxila'.
⁸ Chigula'lë'ë zían bönni' gula'nnë' nácagaquië' Cristo, pero yúgu'të bönni' na' bila'dxinë' zí'alö ca neda', nácagaquië' gubán, en ta'bán cazë', ate' biti' bulu'zé nágaba' bö'cu' zxila' na' légaquië'. ⁹ Neda' naca' ca tu ga nu riyaza. Núti'tës bönni' tsázalenë' neda', ulé' bönni' na', en gáquië' ca tuba' bö'cu' zxila' rázaba', en rurúajba', en ridzóliba' le ráguba'.

¹⁰ 'Za'zë' bönni' gubán para cuanë'-ba', en gútië'-ba', en usunítië'-ba'. Neda' bida' para gata' yöl-la' na'bán idú quégaca bönachi nácagaca ca bö'cu' zxila' quia'. Le nácatë gata' quégaquië' yöl-la' na'bán idú na'.

¹¹ Neda' run chí'igaca' bönachi quia' ca runë' bönni' na', lu yöl-la' dxi'i ladxi' queë' rapa chi'ë yugu' bö'cu' zxila'. Bönni' na' rapa chi'ë-ba' bö'cu' zxila' caní zoa cazë' udödë' yöl-la' na'bán queë' ni'a quégacaba' bö'cu' zxila' queë'. ¹² Tu bönni' nazxjë' rapa chi'ë-ba' bö'cu' zxila', cate' rilé'enë' zá'aba' bö'cu' guí'a sínia', rucá'anë'-ba' bö'cu' zxila' na', en ruzxúnnajë', ate' bö'cu' guí'a sínia' na' ráguya'aba' yugu' bö'cu' zxila' na', en rusilásiba' légacaba'. Caní runë' bönni' na' rapa chi'ë-ba' bö'cu' zxila' tu' cabí náquië' idú nu run chi'i-ba' bö'cu' zxila', ate' biti' néquigacaba' que cazë' bö'cu' zxila' na'. ¹³ Ruzxúnnajë' bönni' nazxjë' na' tu' rapa chi'ë-ba' bö'cu' zxila' na' para sí'isë' dumí, en biti' ruí'i ládxe'ë-ba' bö'cu' zxila' na'.

^{14,15} 'Neda' naca' bönni', lu yöl-la' dxi'i ladxi' quia' run chí'igaca'-ba' bö'cu' zxila'. Ca na' núnbë'ë Xuza' neda', ate' neda' núnbë'a-në' Xuza', lësca' caní núnbe'egacada' bönachi quia' nácagaca ca bö'cu' zxila' quia', en rudöda' yöl-la' na'bán quia' ni'a quégacaba' bö'cu' zxila' na', ate' bö'cu' zxila' na' néquiguequiba' quia' núnbë'gacaba' neda'. ¹⁶ Lësca' nacuá'aba' ia'zica'röba' bö'cu' zxila' quia' biti' nabábagacaba' ni. Lësca' légacaba' ral-la' tsöjxí'gaca'-ba'. Légacaba' ulu'zé nágaba' chi'a, en ilácaba' tuz len ia'zica'röba' bö'cu' zxila' quia', ate' neda' caz gun chí'igaca'-ba'.

¹⁷ 'Que lë ni na' nadxí'inë' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. ¹⁸ Cuntu nu bönni' séqui'në' gútië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

¹⁹ Cate' yugu' bönni' judío bila'yönnë' didza' ni, leyúbölö bila'ruájë' choplö ca téquinë' queë'. ²⁰ Ziánë' ta'nnë':

—Yu'u bö' xihui' Lë', en nachixi icjë'. ¿Bizx que ruzé nágali' Lë'?

²¹ Ia'bal-lë' ta'nnë':

—Biti' ca' ru'ë caní didza' bönni' yu'u bö' xihui' lë'. ¿Naru' huácatsö bö' xihui' usalaj guiöj lógaquië' bönni' nachul-la lógaquië'?

Yugu' bönni' judío unná bë' tu'zöë' Jesús tsölá'alö

²² Raca beo' ziaga, en naca dza na' tunë' laní yödzö Jerusalén, tu'subanë' ca gula'gu'ë yudo' quégaquië' lu në'ë Dios. ²³ Ridé' Jesús ra' yudo' ga naca chila que, nazí'i le Chila Queë' Salomón. ²⁴ Yugu' bönni' judío unná bë' gula'gu'ë Jesús lé'alö, en të' Lë':

—¿Bátaxi caz usanu' runu' ga ró'ötu' böniga? Channö nacu' li' Cristo, ca nácatë gudíxjöi'i netu'.

²⁵ Jesús rë' légaquië':

—Chigudxi caza' libí'ili', pero biti' réajlë'ëli' neda'. Yugu' dxin runa' tu' dë lu na'a uláz queë' Xuza' nácagaca bë' Nu naca'. ²⁶ Libí'ili' biti' réajlë'ëli' neda', tu' cabí nabábalenli' nupa nácagaca bö'cu' zxila' quia', ca na' chigudxi caza' libí'ili'. ²⁷ Ta'yóniba' bö'cu' zxila' quia' chi'a, en tu'únbe'eba' neda', ate' neda' núnbe'egacada'-ba', ate' ridijácalenba' neda'. ²⁸ Neda' runödzja' yöl-la' na'bán idú quégacaba', ate' biti' ca' ila'nítiba', ate' cuntu nu sequi' ubéaj légacaba' lu na'a neda'. ²⁹ Xuza' Dios bennë' quia' légacaba', ate' Lë' nápatërë' yöl-la' huáca ca yúgu'të bönachi, ate' cuntu nu sequi' ubéaj légacaba' lu në'ë Xuza'. ³⁰ Neda', en Dios Xuz, tuz nácatu'.

³¹ Leyúbölö yugu' bönni' judío unná bë' na' bulu'guélë'ë guiöj ulu'ladxë' Jesús. ³² Jesús rë' légaquië':

—Zian le naca dxi'a bena' loli' tu' dë lu na'a uláz queë' Xuza'. ¿Ni'a que bízxilö dxin dxi'a ni uládxil'i' neda' guiöj?

³³ Bulu'bi'ë didza' bönni' judío unná bē' na', tē' Lē':
—Ni'a que dxin dxi'a biti' uládxī'tu' li' guióǝ, pero tu' cabí rnnío' dxi'a queē' Dios, tu' nacu' li' bönáchisö, en run cuinu' Dios.

³⁴ Bubi'ë didza' Jesús, rē' légaquiē':
—¿Naru' cabí nazúaj lu guichi lu xibá queéli' ca gunné' Dios, rna:
“Neda' rnnía': Nácali' yugu' dios”? ³⁵ Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ruí'i lágaquiē' dios, bönni' ni' Dios bé'lenē' légaquiē' didza'. ³⁶ Dios bubéajē' neda' quez queē', en gusól-lē'ē neda' yödzölió ni. ¿Naru' rnnátsali' quia': “Li' biti' rnnío' dxi'a queē' Dios”, tu' gunná': Zxí'inē' Dios naca'? ³⁷ Channö cabí runa' dxin budödē' Xuza' Dios lu na'a, biti' ral-la' tséajlē'ēli' neda'. ³⁸ Channö runa' dxin budödē' Dios lu na'a, sal-la' biti' réajlē'ēli' neda' caz, guli'tséajlē' le nácacagaca bē' dxin na' runa', para guéquibe'eli' náquiē' Dios Xuz tuz len neda', ate' neda' ca' naca' tuz len Xuza'.

³⁹ Leyúbölö gula'zóa gula'bö'ë ila'zönē' Jesús, pero Lē' bulé' lu ná'agaquiē'.

⁴⁰ Ní'irö guyijē' Jesús leyúbölö ia'tsölá'a yegu Jordán, ga ni' buquile' Juan bönachi nisa zí'atölö, ate' bugá'anē' Jesús ni'. ⁴¹ Bila'dxín bönachi zían ga zoē' Jesús, ta'nná:

—Le nácatē biti' benē' Juan nitú yöl-la' huáca zxön, pero yúgu'tē le gunné' Juan na' ca ral-la' gaca queē' bönni' ni, idútē li zeaj naca.

⁴² Que lē ni na' gula'yéajlē'ë bönni' zían Jesús ga na' zoē'.

Le guca cate' gútiē' Lázaro

11 ¹ Dza ni' ré'enē' Lázaro, bönni' Betania, le naca ládzagacanu María, en Marta. Nácanu Marta na' zxílanu María na'.
² Nácanu María na' nigula zanē' Lázaro, bönni' na' ré'enē', en nácanu ca' nigula na' gulú'unu le rilá' zxixi ni'ë Xanru', en buzxinu ni'ë len guitsa' ícjanu. ³ Gula'sól-la'nu nigula zanē' Lázaro na' nu yöjódx Jesús, gunná:
—Xan, buyútsöca', ré'enē' Lázaro, bönni' na' nadxí'inu'-nē'.
⁴ Cate' biyönnē' Jesús didza' ni, gudxē' nupa nacuá' ni', rnnē':
—Yödzöhué' ni biti' naca le guti lē' tsaz, pero naca para ilá' lahui yöl-la' zxön queē' Dios, ate' ni'a que yödzöhué' ni ilá' lahui ca' yöl-la' zxön quia' neda', Zxí'inē' Dios.
⁵ Jesús nadxí'inē' Marta, en nigula zxílanu Marta na', en Lázaro na'.
⁶ Sal-la' nadxí'inē' Jesús légaquiē', cate' biyönnē' ré'enē' Lázaro, bugá'anē' ga na' zoē' ia'chopa dza ca'. ⁷ Cate' bizá'a chopá dza na', Jesús gudxē' yugu' bönni' usēda queē', rnnē':

—Uyéajru' leyúbölö luyú Judea.

⁸ Ní'irö yugu' bönni' usēda queē' tē' Lē', ta'nné':

—Bönni' Usedi, si' gula'zóa gula'bö'ë bönni' judío unná bē' ni' ulu'ladxē' Li' guióǝ. ¿Naru' uyéajtso' leyúbölö ni'?

⁹ Bubi'ë didza' Jesús, rē' légaquiē':

—Nacuá' caz chinnu hora lahui' dza. Nu bönni' ridé' lahui' dza, biti' tsöjchégu'ë, tu' rilé'enë', tu' zóalen lè' bení' zoa yödzölió ni. ¹⁰ Channö ridé' bönni' na' chi'i dzó'ölö, röjchégu'ë, tu' cabí zóalen bení' lè'.

¹¹ Cate' budxi bël'ë Jesús didza' ni, ní'irö gudxë' légaquië':

—Rásië' Lázaro, böchi' luzá'aru', ate' tseja' neda', en usubana'-në'.

¹² Ní'irö yugu' bönni' usëda queë' t'ë Lë', ta'nné':

—Xan, channö rásië', huöáquië'.

¹³ Gunné' caní Jesús tu' chigútië' Lázaro, pero légaquië' téquinë' gunné': Rásisë' Lázaro. ¹⁴ Ní'irö Jesús gudxë' légaquië' yálajdo', gunné':

—Chigútië' Lázaro. ¹⁵ Rudzējada' tu' cabí zoa' ni', tu' gaca na'a tu le uzí'ili' xibé, le gun ga tséajlë'ëli' neda'. Uyéajru' na'a ga na' dë' Lázaro.

¹⁶ Ní'irö Tomás, bönni' na' tu'ë lè', Bönni' Bilidi' gudxë' ia'zica'rë' bönni' usëda queë' Jesús, rnnë':

—Uyéajru' ca' rë'u, en gátillenru'-në'.

Náquië' Jesús Nu rusubán nupa chinátigaca, enca' Nu nabániru'

¹⁷⁻¹⁹ Dë yödzö Betania gála'sö ga dë Jerusalén na', le naca ca rizá'aru' tu hóratëz. Que lë ni na' chibila'dxinë' zían bönni' judío ga na' nacuá'anu Marta, en María, en tu'hué tsáhuë'ë légacanu tu' gútië' bönni' zángacanu. Cate' Jesús bidxinë' ni', biyönnë' chiguca tapa dza yu'ë Lázaro na' yeru ba. ²⁰ Cate' biyóninu Marta didza' zë'ë Jesús, ní'irö birúajnu yu'u, yöjtságanu Lë', pero María bugá'ananu yu'u na'. ²¹ Marta na' rënu Jesús:

—Xan, la'tu' zu' ni, biti' gátië' bönni' zana'. ²² Lësca' na'a, nözda' yúgu'të le inábinu' Dios, Lë' gunné' quiu'.

²³ Jesús rë'ë-nu:

—Ubanë' bönni' zanu'.

²⁴ Marta rënu Lë':

—Nözda' ubanë' cate' idxín dza údxi cate' ulu'bán nupa chinátigaca.

²⁵ Ní'irö Jesús rë'ë-nu:

—Naca caza' neda' Nu rusubán nupa chinátigaca, enca' Nu nabánigaca bönachi. Nu tséajlë' neda', sal-la' gati nu na', ubán caz, ²⁶ ate' yúgu'të bönni' nabángaqüë', en ta'yéajlë'ë neda', biti' ca' ilátië' tsaz. ¿Réajlë'u lë ni?

²⁷ Marta rënu Lë':

—Ön, Xan. Réajlë'a nacu' Li' Cristo, Zxí'inë' Dios, Bönni' na' guzxí' lu në'ë Dios isól-lë'ë yödzölió ni.

Ribödxë' Jesús tu' ruí'i ládxë'ë nigula zanë' Lázaro

²⁸ Cate' budxi bël'ënu Marta na' didza' ni, bóajnu yu'u, yöjlídzanu María, zxílanu, ate' bagáchi'sö rënu lënu:

—Bönni' Usedi zoë' ni, rulidzë' li'.

²⁹ Cate' biyóninu María didza' ni, la' guyástënu, zéajnu ga na' zoë' Jesús. ³⁰ Biti' rázinë' Jesús la' yódzödo' na', pero zóasë' ga na' yöjtságanu Marta Lë'. ³¹ Cate' yugu' bönni' judío na' nacuá'lenë' María na', en tu'hué tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnógaquië'-nu, ta'nnë':

—Uyéajnu ra' yeru ba tsöjchödxinu ni'.

³² Ní'irö bidxinu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, bití' gátië' bönni' zana'.

³³ Cate' bilé'enë' Jesús ribódxinu, en ta'bödxë' ca' bönni' judío na' dzágagaquië'-nu, ní'irö buí'innë', en gunnëda' ládxë'ë. ³⁴ Rnnë':

—¿Gazxi bucáchi'li'-në'?

Të' Lë':

—Gudá uyú'.

³⁵ Gurödxë' Jesús. ³⁶ Ní'irö gula'nnë' bönni' judío na', ta'nnë':

—Buli'yútsöca' ca nadxí'ide'enë' lë'.

³⁷ Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga bití' gátië' Lázaro?

Rubanë' Lázaro lu yöl-la' guti

³⁸ Leyúbölö gunnëda' ládxë'ë Jesús, ate' bidxinë' ra' yeru ba na'. Ba na' naca tu yeru nadaj lë'e guí'a guiój, ate' da' tu guiójta'a le nusayaj ga nu riyaza le. ³⁹ Jesús gudxë' nupa nacuá' ni', rnnë':

—Guli'cúa guiój ni.

Ní'irö Marta, nigula zanë' bönni' nati na', rënu Lë':

—Xan, chirilé'ë siguti tu' chiguca tapa dza nátië'.

⁴⁰ Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxön queë' Dios?

⁴¹ Ní'irö gula'güë' guiójta'a na' nusayaj ga nu riyaza yeru ba ga na' yu'ë bönni' nati na'. Buyüë' Jesús zaca' lúzxibalö, rnnë':

—Xuza', rea' Li', xclenu' tu' riyönnu' neda'. ⁴² Neda' nözda' riyóntiqui'sinu' neda', pero ruá'a didza' ni para ulu'zí' xibé bönachi zían ni, en ila'yéajlë' Li' na' nasöl-lu'u neda'.

⁴³ Cate' budxi bë'ë Jesús didza' ni, zidzaj bulidzë', rnnë':

—Lázaro, burúaj nilö.

⁴⁴ Burúajë' bönni' na' gúquië' bönni' nati lu yeru ba, naróligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Buli'lí lari' na' naröli ni'a në'ë, en guli'gu'ë lataj së'ë.

Tun xtídzë'ë yugu' bönni' judío unná bë' ilútië' Jesús

(Mt. 26:1-5; Mr. 14:1-2; Lc. 22:1-2)

⁴⁵ Ní'irö zían bönni' judío na' gula'yéajlë'ë Jesús, bönni' na' yöjácalenë' tsözxön María, en bila'lé'enë' lë na' benë' Lë'. ⁴⁶ Bal-lë' yöjáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús. ⁴⁷ Ní'irö bönni' yudo' fariseo na' bulu'dúbilenë' tsözxön bönni' yudo' tu'chi'a tu'söröë', en yugu' bixúz unná bë', ta'nnë':

—¿Nacxi caz gunru'? Runë' bönni' ni zían yöl-la' huáca zxön.

⁴⁸ Channö güí'isiru'-në' lataj gunë' ca ni run cazë', ila'yéajlë' yúgu'të bönachi Lë', ate' idijáquië' bönni' Roma ni, duquínnaajgaquië' yudo' lá'ayi queéru', en yödzö queéru'.

⁴⁹ Ní'irö bë'ë didza' Caifás, bixúz lo iz na', en dzáguië' légaquië', rë' légaquië':

—Libí'ili' biti' bi nózili', ⁵⁰ en biti' réquibe'eli' run bayudxi gátië' tuë' bönni' ni'a quégaca bönachi, para cabí initi idú yödzö.

⁵¹ Calëga rácasö queë' bë'ë didza' ni, pero tu' náquië' bixúz lo iz na', que lë ni na' bë'ë didza' uláz queë' Dios ca ral-la' gátië' Jesús ni'a quégaca bönachi yödzö na'. ⁵² Gátië' Jesús, calégasö ni'a que yödzö na', pero gátië' ca' para utubë' yugu' xzí'inë' Dios násilasigaquië', para ilácagaquië' tuz. ⁵³ Caní guca, la' dza ná'asö gulún xtídza'gaquië' ilútië' Jesús. ⁵⁴ Que lë ni na' bíti'rö gudé' Jesús yálajdo' gapa nacué' bönachi judío, pero buzé'ë ni', sa'yéajë' tu lataj gala' ga naca lataj cá'asö, ate' bidxinë' yödzö Efraín, ga ni' bugá'anë', ate' dzágagaquië' bönni' usëda queë' Lë'.

⁵⁵ Dza na' chizá' gala' Laní Pascua quégaquië' bönni' judío cate' tu'subanë' ca benë' Dios, bubéajë' bönachi queë' luyú Egipto. Bila'rúaj bönachi zían yugu' yödzö ni', ate' gula'benë', sőjáquië' Jerusalén cate' si' idxín laní na' para tsőjpá'a cuíngaquië' ca naca que yudo'. ⁵⁶ Yugu' bönni' na' nacu'ë Jerusalén tu'guiljë' Jesús, en cate' ni' nacu'ë chila yudo', gula'nabi luzá'agaquië' tuë' ia'túë', ta'nnë':

—¿Bizxi rusáca'li'? ¿Huídatsë' laní, o biti' guídë'?

⁵⁷ Chigula'nná bë'ë yugu' bixúz unná bë', en yugu' bönni' yudo' fariseo channö nu nözi ga zoë' Jesús, ral-la' ududíxjöi'i légaquië' para gaca tsőjxőngaquië' Lë'.

María rigú'unu le rilá' zxixi ni'ë Jesús

(Mt. 26:6-13; Mr. 14:-3-9)

12 ¹ Cate' ni' nagá'anagaca ia'xopa dza cate' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto, ní'irö bidxinë' Jesús lu yödzö Betania, ga na' zoë' Lázaro, bönni' na' gútië', en bubanë' lu yöl-la' guti. ² Gula'gu'ë tu güí'i huagu ni' le gahuë' Jesús. Gulú'unu María le ilahuë', ate' nútsë'ë Lázaro

ladaj bönni' rō'ölengaquië' Jesús ga na' tahuë'. ³ Ní'irō gudéla'nu María ca tu guíë le rilá' zxixi que yōj susén lasi idú, le nazáca'da', en gulú'unu le ni'ë Jesús. Buzxinu ni'ë len guitsa' ícjanu. Idútë lu yu'u na' guzé bö' zxixi. ⁴ Ní'irō bë'ë didza' tu bönni' usëda queë' Jesús, lë' Judas Iscariote, xzí'inë' tu bönni' lë' Simón, en náquië' bönni' na' udödë' Jesús lu ná'agaquië' yugu' bönni' yudo', rnnë':

⁵ —¿Bizx que biti' gudó'o le rilá' zxixi na', le nazaca' lázxxjaru' que tu iz, ate' huáca nu quisi dumí na' quégaca bönachi yechi'?

⁶ Gunnë' caní, calëga tu' ruí'i ládxë'ë bönachi yechi', pero tu' náquië' gubán, en lë cazë' nu'ë buzudi dumí quégaquië', en rubéajlanë' dumí na' tu'chejë' lu buzudi na'. ⁷ Ní'irō Jesús rë' lë':

—Bë'ë-nu lataj, tu' naca lë ni bennu tu le nabá'a para dza igácha'a.

⁸ Yugu' bönachi yechi' ila'cuá'lentica'sö libí'ili', pero neda' biti' ugá'anatica'sa' ga zóali'.

Tun xtídza'gaquië' bönni' judío unná bë' ilútië' Lázaro

⁹ Cate' bila'yönnë' bönni' judío zoë' Jesús yödz Betania, bila'dxinë' zíanë' ni', calégasö tu' zoë' Jesús ni', pero lësca' tu' té'ënnë' ila'lé'enë' Lázaro, bönni' na' busubanë' Jesús lu yöl-la' guti. ¹⁰ Ní'irō gulún xtídza'gaquië' yugu' bixúz unná bë', ilútië' ca' Lázaro, ¹¹ tu' ta'yéajlë'ë zían bönni' judío Jesús ni'a queë' Lázaro na', en chinulá'alengaquië' yugu' bixúz unná bë' na'.

Len yöl-la' ba zxön razië' Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Bönachi zían bila'dxín Jerusalén dza Laní Pascua, ate' dza buropi na' ta'yöni zë'ë Jesús ni'. ¹³ Ní'irō gula'guítsjë' zin, en bila'rúajë' sōjxí'gala'gaquië' Jesús, ate' gulu'ë zidzaj didza', ta'nnë':

—iYöl-la' ba Dios! iYöl-la' ba Bönni' ni zë'ë uláz queë' Xanru', para inná bé'enë' bönachi Israel!

¹⁴ Budzólinë' Jesús tuba' búrrodo', ate' gudxië'-ba' ca na' nazúaj lu guichi lá'ayi, rnna:

¹⁵ iBiti' gádxili', libí'ili', zóali' yödzö Sión!

iBuli'yútsöca', zë'ë Bönni' inná bé'enë' libí'ili'!

iDxië'-ba' tuba' búrrodo'!

¹⁶ Cate' ni' si' guca lë ni, biti' gula'yéajni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irō yōjnéguequinë' lë ni nazúaj lu guichi lá'ayi ca ral-la' gaca queë', ate' guca queë' caní.

¹⁷ Lësca' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lë lu yöl-la' guti, gulunë' ba nalí queë'. ¹⁸ Que lë ni na' ca' bila'rúajë' bönni' yōjxí'gala'gaquië' Jesús, tu'

bila'yönnë' ca naca yöl-la' huáca ni benë' Lë'. ¹⁹ Ní'irö gula'nnë' la' légacasë' bönni' yudo' fariseo, ta'nnë':

—Chinaca bë' bitì' bi séqui'ru' gunru'. Buli'yú ca dá'gaca yúgu'të bönachi Lë'.

Yugu' bönni' zi'tu' tu'guiljë' Jesús

²⁰ Bal-lë' bönni' zi'tu' dzágagaquië' nupa na' bila'dxín Jerusalén dza Laní Pascua na' para ila'yéaj ládxi'gaquië' Dios. ²¹ Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yüë' lahuë', ta'nnë':

—Bönni', ré'ënitù' ilé'etu'-në' Jesús.

²² Guyijë' Felipe na', en yöjödxe' ca' Andrés. Ní'irö Andrés, en Felipe na' gulé' ca' Jesús. ²³ Bubi'ë didza' Jesús, rë' légaquië':

—Chizóa idxín dza gátia' neda', Bönni' Guljë' Bönachi, huöja' xilatja' yehua' yubá. ²⁴ Le nácatë rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yénni'tërö unödzej. ²⁵ Nu bönni' ruí'i ládxi'dë'ë yöl-la' na'bán queë', unítië' le, tu' gátie' tsaz bönni' na'. Nu bönni' bitì' ruí'i ládxe'ë yöl-la' na'bán dë queë' yödzölió ni gun chi'ë le ga idxinrö dza gata' yöl-la' na'bán idú queë'. ²⁶ Channö ré'ënë' nu bönni' gunë' xichina', ral-la' t'ë'ë neda' bönni' na', ate' ga ni' tsöjsó'a neda', ni' tsöjsóë' ca' bönni' na' runë' xichina'. Channö runë' xichina' nu bönni', Xuza' Dios gunë' bal bönni' na'.

Riguíxjö'ë Jesús ca si' ilútië' Lë'

²⁷ Gunnë' ca' Jesús:

—Na'a rō'a böniga neda'. ¿Nacxi innatsa'? ¿Naru' innía': Xuza', busölá neda' lu le gaca quia' na'a? Que lë ni na' bida', para guá' ilena' le ral-la' gaca quia' na'a. ²⁸ Xuza', ben ga ilá' lahui yöl-la' zxön quiu'.

Ní'irö biyón chi'i Nu ruí'i didza' yehua' yubá, rnna:

—Chibéna' ga nalá' lahui yöl-la' zxön quia', ate' leyúbölö guna' ga ilá' lahui yöl-la' zxön quia' na'.

²⁹ Bila'yöni bönachi zían nacuá' ni' chi'i ni, ate' ta'nná:

—Guziú' na' gunné.

Ia'bal-la bönachi na' ta'nná:

—Tu gubáz lá'ayi queë' Dios bé'lenë' Lë' didza'.

³⁰ Ní'irö bubi'ë didza' Jesús, rë' légaquië':

—Biyón chi'i ni, calëga para uzi'a xibé neda', pero para uzí'ili' xibé libí'ili'. ³¹ Chibidxín dza uchi'a usöróë' Dios bönachi yödzölió ni. Na'a chú'unë' Dios tu' xihui' ní'ilö, nu na' rinná be'e bönachi yödzölió ni.

³² Na'a, channö ilútië' bönni' neda', en ulu'chisë' neda' xitsá', guna' ga ulu'dubi yúgu'të bönachi ga zoa'.

³³ Didza' ni bē'ē Jesús naca bē' ca gátiē'. ³⁴ Bönachi zían na' tē Jesús, ta'nná:

—Netu' biyónitu' nupa bulu'laba le rna xibá queē' Dios, lē na' rna: Sóatica'sē' Cristo. ¿Nacxi caz naca, rnno' Li': "Run bayudxi Bönni' Guljē' Bönachi, ulu'chisē' Lē' xitsá'?"? ¿Nuzxi na' Bönni' Guljē' Bönachi?

³⁵ Ní'irō Jesús rē' légaquiē':

—Ia'tú chí'ido'osō sóalena' neda' libí'ili', en naca' bení' queēli'. Guli'tá tsanni ni zóalena' libí'ili', en zóalen bení' libí'ili', para cabí ichul-la inítili'. Nu bönni' ridé' ga chul-la niti biti' nózine' gazxi sa'yéajē'.

³⁶ Tsanni ni zóalena' libí'ili', naca' bení' queēli'. Guli'tséajlē' neda' naca' bení' queēli' para ilé'eli' bení' na' naca idú.

Cate' Jesús budxi bē'ē didza' ni, yōjhuōjē' yōjcachi' lahuē' lógaquiē'.

Le run nigui bönachi judío, para cabí ila'yéajlē' Jesús

³⁷ Sal-la' benē' Jesús zían yöl-la' huáca lógaquiē', biti' gula'yéajlē' Lē'. ³⁸ Caní guca lē na' buzúajē' Isaías lu guichi, bönni' na' bē'ē didza' uláz queē' Dios, gunné':

Xan, ¿nuzxi caz guyéajlē' didza' bē'ētu'?

¿Nuzxi caz bulu'ínē' Xanru' yöl-la' huáca queē'?

³⁹ Caní guca, biti' guca ila'yéajlē'ē Jesús. Guca ca na' gunné' ca' Isaías:

⁴⁰ Dios benē' ga gula'chul-la gula'nítiē',

ate' guca zidi lādxi'do'gaquiē'

para cabí ila'lé'enē' len guiōj lógaquiē',

en cabí ila'yéajni'inē' lu icja lādxi'do'gaquiē'.

Biti' ulu'huóáquiē' quia' para úngaca'-nē'.

⁴¹ Bē'ē Isaías didza' ni tu' bilé'enē' yöl-la' zxön queē' Cristo, en bē'ē didza' ca naca queē' Lē'. ⁴² Sal-la' raca caní, gula'yéajlē' bönachi zían Jesús, ga bidxintē gula'yéajlē'ē bal-lē' bönni' unná bē' Lē', pero tu' tādxi-nē' yugu' bönni' yudo' fariseo, biti' gulunē' ba nalí queē' yálajdo', para cabí ulu'béajē' légaquiē' tsaz ga na' tu'dubē' tu'sedē' queē' Dios.

⁴³ Caní gulunē' tu' tunrē' zxön le tun bönachi légaquiē' bal ca le runē' Dios légaquiē' bal.

Ilún didza' bē'ē Jesús ga irugu quégaca bönachi ilátigaca

⁴⁴ Bē'ē zidzaj didza' Jesús, rnnē':

—Nu bönni' réajlē'ē neda', calēga néda'sō réajlē'ē, pero réajlē'ē ca' Xuza' nasól-lē'ē neda'. ⁴⁵ Lēscá' caní, nu bönni' rilé'enē' neda', rilé'enē' ca' Xuza' nasól-lē'ē neda'. ⁴⁶ Neda' naca' bení', en bida' yōdzölió ni, para cabí ulu'gá'anē' ga chul-la yúgu'tē bönni' ila'yéajlē'ē neda'. ⁴⁷ Channō riyönnē' nu bönni' xtídza'a, en biti' runē' le bal, calēga neda' ichuga' queē' bönni' na' gátiē', tu' bida' ni, calēga para ichuga' quégaca bönachi yōdzölió ni, pero para usólá' bönachi yōdzölió ni. ⁴⁸ Nu bönni' ruzóē' neda' tsólá'alō, en biti' rizi' lu nē'ē xtídza'a, chizóa le ichuga' queē'

bönni' na'. Didza' na' chibé'lena' libí'ili' naca tu le ichugu queë' bönni' na' dza údxí. ⁴⁹ Caní naca, ruá'a didza', calëga rácasö quia', pero Xuza' nasól-lë'ë neda' gudxë' neda' le ral-la' innía', enca' ca ral-la' gu'a didza'. ⁵⁰ Nözda' gunná bë'ë Dios caní para gata' yöl-la' na'bán idú quégaca bönachi. Caní naca, didza' na' ruá'a, ruá'a didza' ca na' Xuza' chigudxi cazë' neda'.

Jesús riguibë' ní'agaquië' bönni' usëda queë'

13 ¹ Ni' naca dza si' idxín Laní Pascua cate' tu'subanë' bönni' judío ca benë' Dios, bubéajë' bönachi queë' luyú Egipto. Nózinë' Jesús chibidxín dza queë' gátie', cate' ral-la' uzé'ë yödzölió ni, en huöjë' ga zoë' Xuzë'. Ca na' nadxí'inë' bönachi queë' nacuá' yödzölió ni, na'a nadxí'inë' légaquië' ga idxintë gátie' uláz quégaquië'.

² Satanás tu' xihui' chinagú'u yöl-la' Judas Iscariote, zxí'inë' tu bönni' lë' Simón, para udödë' Jesús lu ná'agaca nupa iluti Lë'. ³ Nózinë' Jesús ca naca, birúajë' ga zoë' Dios, en huöjë' ca' ga na' zoë' Dios, ate' Dios Xuzë' chinudödë' lu në'ë Lë' idútë yöl-la' unná bë' queë'. ⁴ Que lë ni na', cate' ni' tahuë', guzuínë' Jesús, en gudúë' lari' rixóa yenë'. Gudélë'ë tu lari' ruxxini ná'aru' le budé'ë lë'ë. ⁵ Ní'irö gudé'ë nisa tu lu zxiga' guë, ate' gusí lahuë' riguibë' ní'agaquië' bönni' usëda queë', en ruzzinë' ní'agaquië' len lari' na' da' lë'ë.

⁶ Cate' bidxinë' ga rö'ë Simón Pedro, Pedro na' rë' Lë':

—Xan, ¿naru' Li' quíbitso' ni'a?

⁷ Bubi'ë didza' Jesús, rë' lë':

—Lë ni runa', biti' réajni'ininu' na'a, pero huadzé tséajni'inu'.

⁸ Ní'irö Pedro rë' Lë':

—Biti' ca' quíbi cazu' Li' ni'a.

Jesús rë' lë':

—Channö neda' biti' quiba' li', biti' ca' séqui'nu' gunu' neda' tsözxón.

⁹ Ní'irö Simón Pedro rë' Lë':

—Xan, calégasö ni'a quibu', pero quibu' ca' na'a, en icja'.

¹⁰ Jesús rë' lë':

—Nu nayari, ní'asö run bayudxi tsari, tu' naca cazë' dxi'a idutë', ate' libí'ili' nácali' dxi'a, pero calëga yúgu'tëli'.

¹¹ Gunnë' caní Jesús: “Calëga yúgu'tëli' nácali' dxi'a”, tu' nózinë' nülögaquië' na' udödi Lë'.

¹² Gudödi gudibë' Jesús ní'agaquië', buguélë'ë lari' na' buxóa yenë'. Bubö'ë ga tahuë', ate' rë' légaquië':

—¿Réajni'ili' lë na' si' bena' queé'li'? ¹³ Libí'ili' ruí'ili' La': Bönni' Usedi enca': Xan. Dxi'a naca ca rnnali', tu' caní naca'. ¹⁴ Na'a, channö neda' naca' Xanli', en Bönni' Usedi queé'li', ate' gudiba' ní'ali', lëscá caní ral-la' gunli' libí'ili', quíbili' ni'a luzá'ali' tuli' ia'tuli'. ¹⁵ Tu le buluí'ida' libí'ili' para gunli' libí'ili' ca na' bena' neda'. ¹⁶ Le nácatë rea' libí'ili':

Biti' nayépisëtèrè' tu bönni' huen dxin ca xanè', ate' bönni' gubáz biti' nayépisëtèrè' ca nu nasöl-la' lè'. ¹⁷ Channö réajni'ili' yúgu'tè lè ni, bica' ba libí'ili' channö gunli' caní. ¹⁸ Didza' ni ruá'a biti' rea' yúgu'tèli'. Nöz quézida' nupa guró caza' neda', pero run bayudxi gaca lè na' nazúaj lu guichi lá'ayi, le rnna: “Nu rágulen neda' tsözxón, nu ni tá'baga' neda'.” ¹⁹ Na'a riguíxjöi'ida' libí'ili' zí'alö ca gaca, para cate' gaca caní, tséajlè'èli' zoa caza' neda'. ²⁰ Le nácatè rea' libí'ili': Nu bönni' gunè' bal gubáz isöl-la'a neda', neda' ca' gunè' bal, ate' nu bönni' gunè' neda' bal, gunè' ca' bal Xuza', nasöl-lè'è neda'.

Riguíxjö'è Jesús ca gunè' Judas, udödè' Lè'

(Mt. 26:20-25; Mr. 14:17-21; Lc. 22:21-23)

²¹ Cate' Jesús budxi bè'è didza' ni, buí'innè', ate' yálajdo' gunné':
—Le nácatè rea' libí'ili': Tu bönni' nútsè'è ládjali' udödè' neda'.

²² Ní'irö bulu'yú lo luzá'agaquiè' tuè' ia'túè' bönni' usèda queè', en gula'cu'è böniga, ate' ta'naba ládxi'gaquiè' nuzxi que na' gunné' Jesús caní. ²³ Tuè' bönni' usèda queè' Jesús, bönni' na' Jesús nadxí'inè' lè', zoè' cuita lè'è. ²⁴ Simón Pedro bulá'a bulu'isè' bönni' ni para inábinè' Jesús nuzxi que na' gunné' caní. ²⁵ Ní'irö bönni' na' zoè' cuita lè'è Jesús rè' Lè':

—Xan, ¿nuzxi na' ru'u didza' que?

²⁶ Bubi'è didza' Jesús, rè' lè':

—Náquiè' bönni' na' gu'a-nè' yöta xtila nabisa.

Ní'irö busubísiè' yöta xtila na', en bè'è queè' Judas Iscariote, zxí'inè' tu bönni' lè' Simón. ²⁷ Gudödi gudahuè' Judas yöta xtila na', guyaza Satanás tu' xihui' icja ládxi'da'ahuè'. Ní'irö Jesús rè' lè':

—Lè na' gunu', yöjentè na'a.

²⁸ Biti' ta'yéajni'inè' ia'zica'rè' bönni' usèda queè' ró'ögaquiè' tahuè' bizx que na' Jesús gudxè' lè' caní. ²⁹ Tu' nu'è Judas buzudi dumí quégaquiè', téquinè' bal-lè' Jesús gudxè' lè': Yöxí' le gáguru' laní, o gunné': Bè' lati' quégaca bönachi yechi'. ³⁰ Cate' budxi gudahuè' Judas yöta xtila na', en ni' naca chi'i dzö'ölö, la' birúajtè'.

Tu xibá cubi

³¹ Cate' chibirúajè' Judas na', ní'irö gunné' Jesús:

—Na'a chizóa ilá' lahui yöl-la' zxön quia' neda', Bönni' Guljè' Bönachi, en ilá' lahui ca' yöl-la' zxön queè' Dios. ³² Channö ilá' lahui yöl-la' zxön queè' Dios ni'a quia' neda', Zxí'inè', lësca' Lè cazè' Dios gunè' ga ilá' lahui yöl-la' zxön quia' neda', Zxí'inè', en la' guntè' caní. ³³ Libí'ili', zxí'ina'do', ia'tú chí'isö zóalena' libí'ili'. Uguíljali' neda', ate' ca na' chigúdxigaca'-nè' bönni' judío, lësca' rea' libí'ili' na'a: Ga na' tseja' neda', biti' gaca guídali' rácasö queéli'. ³⁴ Rea' libí'ili' tu xibá cubi le rnna caní: Guli'dxí'i luzá'ali' tuli' ia'tuli'. Ca na' neda' nadxí'ida'

libí'ili', lësca' caní ral-la' idxí'ili' luzá'ali' tuli' ia'tuli'. ³⁵ Channö huadxí'i luzá'ali' tuli' ia'tuli', iléquibe'e yúgu'të bönachi dá'ali' neda'.

Rnnë' Jesús innë' Pedro biti' núnbë'ë Lë'

(Mt. 26:31-35; Mr. 14:27-31; Lc. 22:31-34)

³⁶ Ní'irö Simón Pedro gunábinë' Jesús, rnnë':

—Xan, ¿gazxi caz tseju'?

Bubi'ë didza' Jesús, rnnë':

—Ga na' tseja' neda', biti' gaca sá'lenu' neda' na'a, pero huadzé guídu' ga tseja' neda'.

³⁷ Pedro rë' Lë':

—Xan, ¿bizx que biti' gaca sá'lenu' Li' na'a? Chizóa' udöda' yöl-la' na'bán quia', gátia' tu' nadxí'ida' Li'.

³⁸ Bubi'ë didza' Jesús, rë' lë':

—¿Naru' udödu' yöl-la' na'bán quiu' tu' nadxí'inu' neda'? Le nácatë rea' li', zí'alö ca códxiba' böra, li' tá'bágu'u tsonna luzuí, innó' biti' núnbë'u neda'.

Náquië' Jesús nöza tséajlenru' para idxinru' ga zoë' Dios Xuz

14 ¹ Rnnë' Jesús:

—Biti' cö'li' baniga lu icja ládxi'do'oli'. Guli'tséajlë' Dios, en guli'tséajlë' ca' neda'. ² Lu yu'u lidxë' Xuza' lataj zían nacuá'. La'tu' cabí naca caní, neda' chigudxi caza' libí'ili'. Tseja' na'a, tsöjpá'a lataj queéli' ga tsöjsóali'. ³ Channö huayéaja', en tsöjpá'a lataj queéli' ga tsöjsóali', huöda' leyúbölö, ate' uchë'a libí'ili' lataj quia', para ga na' tsöjsó'a neda', tsöjsóali' ca' libí'ili'. ⁴ Nöz quézili' ga ni' tseja', en núnbë'ëli' ca' nöza.

⁵ Tomás rë' Lë':

—Xan, biti' nöztu' gazxi na' tseju'. ¿Nacxi caz gaca gúnbë'ëtu' nöza?

⁶ Bubi'ë didza' Jesús, rë' lë':

—Neda' naca caza' nöza, en naca' ca' le naca idútë li, en naca' ca' Nu nabánigaca bönachi. Ni'a quia' néda'sö gaca nu idxín ga zoë' Dios Xuz.

⁷ La'tu' núnbë'ëli' neda', Xuza' ca' núnbë'ëli'-në'. Na'a, núnbë'ëli'-në', en chibilé'eli'-në'.

⁸ Ní'irö Felipe rë' Lë':

—Xan, buluí'i netu' Xuzu', ate' nácatë queé'tu'.

⁹ Bubi'ë didza' Jesús, rë' lë':

—Felipe, xidzé chiguca zóalena' libí'ili'. ¿Naru' cabí núnbë'ëtso' neda'? Nu bönni' rilé'enë' neda', rilé'enë' ca' Xuza'. ¿Rnnatso': "Buluí'i netu' Xuzu'?" ¹⁰ ¿Naru' cabí réajlë'u zóalen caza'-në' Xuza', ate' Xuza' zóalen cazë' neda'? Yugu' didza' ni ruí'ilena' libí'ili', calëga rácasö quia' ruá'a didza' ni, pero Xuza' zóalen cazë' neda', Lë cazë' runë' dxin ni.

¹¹ Guli'tséajlë' neda', zóalen caza'-në' Xuza', ate' Xuza' zóalen cazë'

neda'. Channö cabí gaca gunli' caní, guli'tséajlë' neda' ni'a quégaca dxin ni runa'. ¹² Le nácatë rea' libí'ili': Yugu' dxin ni runa' neda', lësca' gunë' bönni' na' réajlë'ë neda', ate' le zxóntërö ca' gunë' bönni' na' tu' huöja' ga zoë' Dios Xuz. ¹³ Yúgu'të le inábili' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxí'inë', yöl-la' zxön queë' Dios Xuz. ¹⁴ Bítitës bi inábali', en ugunli' dxin La' neda', neda' guna' le.

Jesús isól-lë'ë Dios Bö' Lá'ayi, para idisóalenë' bönachi queë'

¹⁵ Rnnë' ca' Jesús:

—Channö nadxí'ili' neda', guli'gún le rea' libí'ili', ¹⁶ ate' neda' gáta'yua' lahuë' Dios Xuz, ate' Lë' isól-lë'ë queéli' Nu yúbölö Nu gácalen libí'ili', Nu utipa ládxi'li', en sóalenticas'ö libí'ili'. Nu ni naca Dios Bö' Lá'ayi, Nu ruí'i didza' idútë li. ¹⁷ Biti' gaca ulu'z' bönachi yödzölió ni xibé' Lë', tu' cabí gaca ila'lé'e Lë', en biti' gaca ilúnbe'e Lë'. Zóalen cazë' libí'ili', ate' soë' lu icja ládxi'do'oli'. ¹⁸ Biti' ucá'ana' libí'ili' ca yugu' bi'i uzébido'. Huöda' udusóalena' libí'ili'. ¹⁹ Ia'tú chí'ido'osö bítirö ila'lé'e bönachi yödzölió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. ²⁰ Dza ní'irö cate' Dios Bö' Lá'ayi na' idisóalenë' libí'ili', inóz quézili' zóalen caza'-në' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'. ²¹ Nu bönni' rizi' lu në'ë xtídza'a, en runë' ca rnna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', ate' neda' idxí'ida'-në' bönni' na', en uluí'i lahua' lahuë'.

²² Judas rë' lë', pero calëga Judas Iscariote, rnnë':

—Xan, ñnacxi caz gaca uluí'i lo' lotu' netu', en biti' uluí'i lo' lógaca bönachi yödzölió?

²³ Bubi'ë didza' Jesús, rë' lë':

—Nu bönni' nadxí'inë' neda' gunë' ca rnna xtídza'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ládxi'da'ahuë'. ²⁴ Bönni' na' biti' nadxí'inë' neda' biti' runë' ca rnna xtídza'a. Didza' na' biyónili' bë'a neda', calégasö quia' na', pero naca queë' Dios Xuz nasól-lë'ë neda'.

²⁵ Rë caza' libí'ili' yugu' lë ni tsanni ni zóalena' libí'ili', ²⁶ pero Dios Bö' Lá'ayi gácalenë' libí'ili', en utipë' ládxi'li'. Xuza' Dios isól-lë'ë Lë' queéli' tu' ugunli' dxin La' neda'. Usédinë' libí'ili' yúgu'të, en usé'ë ládxi'li' ca naca yúgu'të didza' na' chigudxa' libí'ili'.

²⁷ Rucá'ana' queéli' le cuéqui dxi ládxi'li'. Runna' queéli' yöl-la' rö'ö dxi ladxi' quia'. Yöl-la' rö'ö dxi ladxi' na' runna' queéli' biti' naca ca le tunna queéli' bönachi yödzölió ni. Biti' ichixi icja ládxi'do'oli', en biti' gadxi idzóbili'. ²⁸ Chibiyónili' ca na' chigudxa' libí'ili': Huöja', ate' huöda' udusóalena' libí'ili'. La'tu' nadxí'ili' neda', udzéjali' cate' ni' gudxa' libí'ili' huöja' ga zoë' Dios Xuz, tu' nayépisëtërë' Dios Xuz ca

neda'. ²⁹ Na'a, chigudxa' libí'ili' zí'alö ca si' gaca, para cate' gaca caní, tséajlë'ëli' neda'.

^{30,31} 'Bíti'rö güí'ilena' libí'ili' didza' zían, tu' za' tu' xihui', nu rinná be'e bönachi yödzülió ni. Sal-la' biti' bi dë lu në'e bi gun quia' neda', ral-la' gaca caní para iléquibe'e bönachi yödzülió ni nadxí'ida'-në' Dios Xuz, en runa' ca na' chigudxë' neda' guna'. Guli'chasa, uzá'aru' ni.

Ca naca que lubá uva, en ni'a në'e lubá na'

15 ¹ Lësca' caní Jesús gudxë' légaquië':

—Naca' neda' ca tu lubá uva le naca idú dxi'a, ate' Xuza' náquië' ca bönni' guz gú'una rapa chi'ë lubá na'. ² Ugüë' yúgu'të ni'a në'e lubá na' naca' neda', le cabí bi ta'bía, ate' uchi'ë yúgu'të ni'a në'e na' ta'bía, para ila'bía ia'lati'. ³ Libí'ili' chinácali' dxi'a ni'a que didza' na' chibé'lëna' libí'ili'. ⁴ Guli'dá'tica'sö neda', ca na' neda' dá'tica'sa' ca libí'ili'. Ca naca que ni'a në'e lubá na', biti' gaca bi cuía rácasö que, channö cabí dá'tica'sö lubá na', lësca' caní naca queé'li', biti' bi gaca gunli' channö cabí tá'tica'sili' neda'.

⁵ 'Naca' neda' ca lubá na', ate' libí'ili' nácali' ca ni'a në'e. Nu bönni' dá'tica'së' neda', ca na' neda' dá'tica'sa' lë', bönni' ni náquië' ca ni'a në'e lubá na' ribía yenni', tu' channö nulá'alëni' neda', biti' bi gaca gunli'. ⁶ Nu bönni' biti' dá'tica'së' neda', gaca queë' ca raca quégaca ni'a në'e lubá na' biti' nacagaca dxi'a, ta'rú'unë' ni'a në'e na', ate' ila'bidxi. Cate' chinabídxigaca ni'a në'e na', ulu'tubë' léguequi, en ila'gu'ë léguequi lu guí', ate' tséguigaca.

⁷ 'Channö tá'tica'sili' neda', en gunli' ca rnna xtídza'a, huáca inábali' bi gué'ënili', ate' neda' guna' lë na' inábali'. ⁸ Gunli' bal Xuza' Dios cate' gunli' xichinë', ate' gácali' ca ni'a në'e lubá na' ta'bía, en caní gaca bë' nácali' idú bönni' ta'dé'ë neda'. ⁹ Ca na' nadxí'inë' Dios Xuz neda', lësca' caní nadxí'ida' libí'ili'. Guli'gúntica'sö ca ral-la' gunë' bönni' nadxí'ida'-në'. ¹⁰ Channö gunli' ca rea' libí'ili', gunli' ca ral-la' gunë' bönni' nadxí'ida'-në', ca na' neda' ca' runa' ca chigudxë' Xuza' Dios neda' guna', en rúntica'sa' le raza ládxë'ë Lë', Bönni' na' nadxí'inë' neda'.

¹¹ 'Yugu' didza' ni rea' libí'ili' para udzéjalëni' tsözxón neda', en gaca idú ca na' udzéjali'. ¹² Lë ni naca le rea' libí'ili' gunli': Guli'dxí'i luzá'ali' tuli' ia'tuli', ca na' neda' ca' nadxí'ida' libí'ili'. ¹³ Biti' gaca idxí'irönë' nu bönni' luzé'ë ca nu bönni' udödë' yöl-la' na'bán queë', gátië' para gácalënë' yugu' böchi' luzé'ë tu' nadxí'inë' légaquië'. ¹⁴ Libí'ili' nácali' böchi' luzá'a channö gunli' ca na' chigudxa' libí'ili' gunli'. ¹⁵ Bíti'rö innía' queé'li' nácali' huen dxin quia', tu' cabí nózinë' bönni' huen dxin naca gunë' xanë'. Neda' chigunnía' queé'li' nácali' böchi' luzá'a, tu' chibëna' ga nózili' yúgu'të le chigudxë' Xuza' neda' guna'. ¹⁶ Calëga libí'ili' guröli' neda', pero neda' guró caza' libí'ili', en buzóa' libí'ili' para tséajli' bi tsöjenli', ca na' tun ni'a në'e lubá na' ta'bía yenni', ate'

ugá'anatica'sö lë na' gunli'. Caní gaca, Xuza' Dios gunnë' queéli' yúgu'të le inábili' Lë', en ugunli' dxin La' neda'. ¹⁷ Lë ni naca le rea' libí'ili' gunli': Guli'dxí'i luzá'ali' tuli' ia'tuli'.

Bönachi yödzölió tu'zóa tsölá'alö Jesús, en nupa dá'gaca Lë'

¹⁸ Gunnë' ca' Jesús:

—Channö bönachi yödzölió ni tu'zóa libí'ili' tsölá'alö, nózili' chibulu'zöë' neda' tsölá'alö zí'alö ca tu'zöë' libí'ili' tsölá'alö na'a.

¹⁹ La'tu' nácali' tuz len bönachi yödzölió ni, huala'dxí'i bönachi yödzölió ni libí'ili' ca na' ta'dxí'i luzé'eguequi, pero tu'zóa bönachi yödzölió ni libí'ili' tsölá'alö tu' cabí nácali' tuz len léguequi, tu' guró caza' neda' libí'ili', en guléaja' libí'ili' ladaj bönachi yödzölió ni. ²⁰ Guli'tsöjné didza' na' chigudxa' libí'ili', gunnía': Biti' nayépisëtërë' nu bönni' huen dxin ca xanë'. Channö gula'bía ládxi'gaca bönachi neda', ila'bía ládxi'gaca ca' libí'ili'. Channö nacuá' nupa tun ca rnna xtídza'a, ilún ca' ca rnna xtídza'li' libí'ili'. ²¹ Yúgu'të lë ni ilún bönachi queéli' tu' dá'ali' neda', tu' cabí núnbë'gaca Dios Xuz nasól-lë'ë neda'.

²² 'La'tu' cabí bida', en la'tu' cabí bé'lëna' légaquië' didza', biti' ila'báguë'ë dul-la', pero na'a tu' bida' ni, biti' bi gaca ila'nné' que dul-la' nabága'gaquië' le ubéaj légaquië' dxi'a. ²³ Nu bönni' ruzóë' neda' tsölá'alö, ruzóë' ca' Xuza' Dios tsölá'alö. ²⁴ La'tu' cabí bena' yugu' yöl-la' huáca ga nacu'ë, yugu' le cuntú nu ben ca gulaca, biti' ila'báguë'ë dul-la'. Na'a, bila'lé'enë' yugu' lë na' bena', ate' tu'zöë' neda' tsölá'alö, en tu'zöë' ca' Xuza' tsölá'alö. ²⁵ Caní raca, para gaca ca rnna xtídzë'ë Dios, le nazí' lu ná'agaquië', le rnna: Tu'zöë' neda' tsölá'alö, en biti' zoa bizx que.

²⁶ 'Cate' idxinë' Dios Bö' Lá'ayi, Bönni' ru'ë didza' idútë li, en gácalenë' libí'ili', utipë' ládxi'li'. Isól-la'a Bönni' na' queéli' uláz queë' Dios Xuz, ate' gunë' ba nalí quia' neda'. ²⁷ Libí'ili' ca' gunli' ba nalí quia', tu' zóalen cázali' neda' tsözxón dza ni'te.

16 ¹ Gunnë' ca' Jesús:

—Yugu' didza' ni chigudxa' libí'ili', para cabí gaca chopa ládxi'li'. ² Yugu' bönni' judío ulu'béajë' libí'ili' tsaz ga tu'dubë' tu'sëdë' queë' Dios, ate' idxín dza cate' nu bönni' gútië' libí'ili' guéquinë' dxin queë' Dios runë'. ³ Caní ilunë', tu' cabí núnbë'gaquië' Dios Xuz, en cabí núnbë'gaquië' neda'. ⁴ Rea' libí'ili' yugu' didza' ni, para cate' idxín dza na', tsöjnéli' didza' ni chigudxi caza' libí'ili'.

Le gunë' Dios Bö' Lá'ayi

Gunnë' ca' Jesús:

—Yugu' didza' ni biti' gudxa' libí'ili' dza ni'te, tu' ni' zóalen caza' libí'ili'. ⁵ Na'a huöja', tsöjsóalëna'-në' Dios Xuz, nasól-lë'ë neda'. Biti' inábili' neda' nituli' libí'ili', biti' innali': ¿Gazxi tseju'? ⁶ Na'a, tu' rea'

libí'ili' yugu' didza' ni, risëbi ládxi'li'. ⁷ Neda' rea' libí'ili' le naca idútë li. Gácarö dxi'a queéli' huöja', tu' channö cabí huöja', bití' idisóalenë' Dios Bö' Lá'ayi libí'ili', Bönni' na' gácalenë' libí'ili', en utipë' ládxi'li', pero channö huöja', isól-la'a-në', na' idisóalenë' libí'ili'. ⁸ Cate' guídë' Lë', gunë' ga iléquibe'e bönachi yödzölió ni nabága'gaca dul-la', en bití' núnbë'gaca le naca tsahui', ate' ichúguië' Dios quéguequi ilátigaca. ⁹ Nabága'gaquië' dul-la' tu' cabí ta'yéajlë'ë neda'. ¹⁰ Bití' núnbë'gaquië' le naca tsahui' tu' ilútië' neda', ate' huöja' ga zoë' Dios Xuz, Bönni' na' náquië' tsahui', ate' bítirö ila'lé'enë' neda'. ¹¹ Ichúguië' Dios quégaquië' ilátië' tu' chiguchúguië' que tu' xihui' nu rinná be'e bönachi yödzölió ni. ¹² 'Ia'zica' zían didza' ré'ënda' gü'ile'na' libí'ili', pero bití' gaca tséajni'ili' na'a. ¹³ Cate' guídë' Dios Bö' Lá'ayi, Bönni' na' ru'ë didza' idútë li, Lë' usedinë' libí'ili' yúgu'të le naca idútë li na', tu' cabí gu'ë didza' rácasö queë', pero gu'ë yúgu'të didza' na' yönnë' ru'ë Xuza', en gunë' ga inózili' yúgu'të le ral-la' gaca. ¹⁴ Lë' gunë' neda' bal, tu' si'ë le nequi quia', en gunë' ga inózili' le. ¹⁵ Yúgu'të le nequi queë' Dios Xuz nequi quia'. Que lë ni na' gunnía' si'ë le nequi quia', en gunë' ga inózili' le.

Yöl-la' risëbi ládxi' queéli' huöáca yöl-la' rudzeja

¹⁶ Gunnë' ca' Jesús:

—Yetú chí'ido'osö, en bítirö ilé'eli' neda', ate' ia'tú chí'ido'osö ca' ulé'eli' neda', tu' huöja' ga zoë' Dios Xuz.

¹⁷ Ní'irö bönni' usëda queë' gulé luzá'agaquië' tuë' ia'túë', ta'nnë':

—¿Bizxi rnna didza' ni rë' rë'u? Rnnë': “Ia'tú chí'ido'osö, en bítirö ilé'eli' neda', ate' ia'tú chí'ido'osö ca' ulé'eli' neda', en naca tu' huöja' ga zoë' Dios Xuz.”

¹⁸ Ní'irö gula'nnë':

—¿Bizxi caz ré'ëni inná didza' ni, gunné': “Ia'tú chí'ido'osö”? Bití' réajni'itu' didza' ni ru'ë.

¹⁹ Réquibe'enë' Jesús té'ënnë' ila'nábinë' Lë', ate' rë' légaquië':

—¿Naru' rinábitsö luzá'ali' ca naca que didza' na' bë'a, gunnía': Ia'tú chí'ido'osö, en bítirö ilé'eli' neda', ate' ia'tú chí'ido'osö ca' ulé'eli' neda'? ²⁰ Le nácatë rea' libí'ili': Códxili', en isëbi ládxi'li', pero bönachi yödzölió ni ulu'dzeja cate' iluti neda'. Ní'irö sal-la' isëbi ládxi'li', yöl-la' risëbi ládxi' queéli' huöáca yöl-la' rudzeja cate' ulé'eli' neda'. ²¹ Tu nigula cate' chizóa gáljabi' bí'ido' queënu, rigu'í' rizáca'nu, tu' chibidxín dza queënu, pero cate' chizóabi' tubi' bi'i bönni'do' queënu, bítirö röjnenu lë na' butságanu, tu' rudzéjanu tu' chigúlajbi' tubi' bi'i bönni'do' yödzölió ni. ²² Lësca' caní raca queéli', risëbi ládxi'li' na'a, pero huöda' uduyúa' libí'ili', ate' ní'irö udzeja ládxi'li', ate' bití' séqui'në' nu bönni' ugüë' yöl-la' rudzeja queéli' na'.

²³ 'Dza ní'irö bití' bi inábili' neda'. Le nácatë rea' libí'ili': Yúgu'të le inábili' Dios Xuz, en ugunli' dxin La' neda', Lë' gunnë' queéli'. ²⁴ Ga ridxintë na'a dza bití' rugunli' dxin La' neda' cate' bi rinábili'-në' Dios Xuz. Guli'naba caní, ate' idéli'li' lë na' inábali', para gaca idú yöl-la' rudzeja queéli'.

Ridéli'në' Jesucristo lu le raca yödzölió ni

²⁵ Gunnë' ca' Jesús:

—Yugu' lë na' chibé'lëna' libí'ili' didza' bucúdz'u'a didza'. Huadxín dza cate' bítirö güi'ilená' libí'ili' didza' le rucúdz'u'a didza', pero yálajdo' güi'ilená' libí'ili' didza' ca naca queë' Dios Xuz. ^{26,27} Dza na' inábili'-në' Dios, en ugunli' dxin La' neda', ate' rea' libí'ili', bití' gun bayudxi gáta'yua' lahuë' Dios Xuz uláz queéli', tu' nadxí'inë' Lë cazë' Dios Xuz libí'ili'. Nadxí'inë' libí'ili' tu' nadxí'ili' neda', en réajlë'ëli' birúaja' ga zoë' Dios. ²⁸ Birúaja' ga zoë' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huöja' ga zoë' Dios Xuz.

²⁹ Ní'irö yugu' bönni' usëda queë' gulé' Lë', ta'nnë':

—Na'a ru'u didza' yálajdo', en bítirö rucúdz'u'a didza'. ³⁰ Na'a réquibe'etu' nöz quézinu' Li' yúgu'të, en bití' run bayudxi nu bi inabi yudxi Li', tu' riguíxjöi'ínu' netu' le si' inábatu'. Que lë ni na' réajlë'ëtu' birúaju' ga zoë' Dios.

³¹ Bubi'ë didza' Jesús, rë' légaquië':

—¿Naru' réajlë'tsali' neda' na'a? ³² Buli'yú, huadxín dza, en chiridxín dza na', cate' gásilasili' que queéli', en ucá'anali' neda' tuza', pero bití' soa' tuza', tu' zóalen cazë' Dios Xuz neda'. ³³ Yugu' didza' ni chigudxa' libí'ili' para cuéqui dxi ládxi'li', tu' nácali' quia' neda'. Lu yödzölió ni gaca queéli' le usaca' zi' libí'ili', pero buli'tipa ládxi'li'. Neda' chibidéli'da' lu le raca yödzölió ni.

Jesús rinábinë' Dios gácalenë' nupa dá'gaca Lë'

17 ¹ Cate' budxi bë'ë Jesús yugu' didza' ni, guchisa lahuë', ruyúë' yehua' yubálö, ate' rnnë':

—Dios Xuz, chibidxín dza. Ben ga ilá' lahui yöl-la' zxön quia' neda', Zxí'ínu', para gaca guna' ga ilá' lahui yöl-la' zxön quiu' Li'. ² Ben caní tu' chinudödu' lu na'a yöl-la' unná bë' para inná bé'eda' yúgu'të bönachi, en gu'a yöl-la' na'bán idú quégaca yúgu'të nupa na' chibennu' quia'. ³ Lë ni naca yöl-la' na'bán idú na', tu' núnbë'gaquië' Li', nacu' la's dui Dios idú, en tu' núnbë'gaquië' ca' neda', Jesucristo, ate' Li' nasól-lu'u neda'.

⁴ 'Neda' chibena' ga nalá' lahui yöl-la' zxön quiu' yödzölió ni, en chibudxi bena' dxin na' budödu' lu na'a. ⁵ Na'a, Xuz, ben ga ilá' lahui yöl-la' zxön napa' tsözxón len Li', para gaca quia' yöl-la' zxön guta' quia' tsözxón len Li' dza ni'te quez cate' si' gata' yödzölió.

⁶ 'Chibulu'a lahui le nacu' Li' lógaquië' bönni' ni bennu' quia', nupa na' guró cazu' Li' ladaj bönachi yödzölió. Guléquinë' bönni' ni quiu', ate' bénnagacu'-në' quia', ate' tunë' ca rna xtídz'u. ⁷ Na'a nózguequinë' yúgu'të lë na' bennu' quia' zá'gaca lu no'o Li', ⁸ tu' chibudöda' lu ná'agaquië' didza' na' budödu' Li' lu na'a neda', ate' légaquië' nazí' lu ná'agaquië' le, en téquibe'enë' birúaja' ga zu' Li', ate' ta'yéajlë'ë Li' nasól-lu'u neda'.

⁹ 'Neda' ráta'yua' Lo' gácalenu' légaquië'. Ráta'yua' Lo', calëga gácalenu' yúgu'të bönachi yödzölió, pero gácalengacu'-në' bönni' ni chibénnagacu'-në' quia', tu' néquiguequinë' quiu'. ¹⁰ Yúgu'të nupa néquiguequi quia' néquiguequi ca' quiu', ate' nupa na' néquiguequi quiu' néquiguequi ca' quia', ate' ca nácagaca nupa na' rulu'i lahui yöl-la' zxön quia'.

¹¹ 'Na'a, bíti'rö ugá'ana' yödzölió ni, pero yugu' bönni' ni ulu'gá'anë' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilácagaca tuz, ca na' nácaru' rë'u tuz. ¹² Cate' ni' guzóalena' légaquië' yödzölió ni, ben chí'igaca'-në', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-në', ate' nitúë' bití' bunítia'-në', pero tuzë' bönni' na' náquië' ca xzí'ini tu' xihui', en narugu queë' gátie' tsaz. Caní raca ca nazúaj lu guichi lá'ayi.

¹³ 'Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégaquië' ca na' raca quia' neda' yöl-la' rudzeja. ¹⁴ Neda' chibudöda' lu ná'agaquië' xtídz'u, ate' bönachi yödzölió ni tu'zóa légaquië' tsölá'alö tu' cabí nácagaquië' tuz len léguequi, ca na' naca quia' neda', bití' naca' tuz len bönachi yödzölió ni. ¹⁵ Ráta'yua' Lo', calëga cúagacu'-në' yödzölió ni, pero gun chí'igacu'-në', para cabí ila'dzunë' lu na' tu' xihui'. ¹⁶ Bití' nácagaquië' tuz len bönachi yödzölió ni ca na' naca quia' neda', bití' naca' tuz len bönachi yödzölió. ¹⁷ Guléaj quez quiu' légaquië', ugunu' dxin le naca idútë li. Le naca idútë li na' naca xtídz'u. ¹⁸ Ca na' benu' Li', gusól-lu'u neda' ladaj bönachi yödzölió ni, lësca' caní runa' neda', risól-la'gaca'-në' ladaj bönachi yödzölió. ¹⁹ Tu' nadxí'igacada'-në' rudödi cuina' quiu', para ulu'rúajë' ca' légaquië' quez quiu' tu' nazí' lu ná'agaquië' le naca idútë li.

²⁰ 'Ráta'yua' Lo', calëga quégacasë' bönni' ni, pero lësca' quégaquië' bönni' ni' ila'yéajlë'ë neda' ni'a que didza' ilu'ë bönni' ni. ²¹ Ráta'yua' Lo' gunu' ga ilácagaquië' tuz yúgu'të', en ilácagaquië' ca' tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ral-la' ilácagaquië' para ila'yéajlë' ia'zíca'rö bönachi yödzölió ni, Li' caz gusól-lu'u neda'. ²² Yöl-la' zxön na' bennu' quia', neda' bë'a ca' quégaquië', para ilácagaquië' tuz, ca na' nácaru' tuz rë'u. ²³ Li' nacu' tuz len neda', ate' neda' naca' tuz len légaquië', para gaca idú ca

nácagaquië' tuz, en caní iléquibe'e ia'zica'rö bönachi yödzölió ni, Li' caz gusól-lu'u neda', ate' nadxí'igacanu'-në' ca na' nadxí'inu' neda'.

²⁴ 'Xúza'do', ré'ënda' ila'cuá'lenë' neda' bönni' ni bénnagacu'-në' quia' ga na' tsöjsó'a', para ila'lé'enë' yöl-la' zxön na' bennu' quia' dza ni'te cate' si' gunu' yödzölió tu' nadxí'inu' neda'. ²⁵ Xuza' tsahui', bönachi yödzölió ni bití' núnbë'gaca Li', pero neda' nunbë' caza' Li', ate' yugu' bönni' ni chinóziguequinë' Li' caz gusól-lu'u neda'. ²⁶ Bena' ga nóziguequinë' le nacu' Li', en gunra' ca' ga ila'nózinë' lë ni para ca na' nadxí'inu' Li' neda', lësca' caní ila'dxí'i luzá'agaquië', ate' gaca caza' tuz len légaquië'.

Ta'zönë' Jesús

(Mt. 26:47-56; Mr. 14:43-50; Lc. 22:47-53)

18 ¹ Cate' budxi bë'ë Jesús yugu' didza' ni, birúajë' ni', ate' sa'yéajlenë' yugu' bönni' usëda queë'. Gudödë' ia'tsölá'a yegu Cedrón, en bidxinë' ga ni' nacuá' yaga olivo ca', ate' lataj ni guyázalenë' yugu' bönni' usëda queë'. ² Lësca' Judas, bönni' na' udödë' Jesús, núnbë'ë la' yëla na', tu' butubë' Jesús yugu' bönni' usëda queë' ni' zían luzuí. ³ Ní'irö guché'ë Judas tu cö' bönni' rójáquië' gudil-la, en yugu' bönni' ni'a ná'agaquië' bixúz unná bë', en ni'a ná'agaquië' yugu' bönni' yudo' fariseo, ate' yójáquië' ga ni' zoë' Jesús, nuá'agaquië' yugu' guí' yöri, en yugu' le tu'dí'inë'. ⁴ Ní'irö, tu' nózine' Jesús yúgu'të le ral-la' gaca queë', birúajë' ga ni' zoë', en rë' légaquië':

—¿Nuzxi riguíljalí'?

⁵ Bulu'bi'ë didza', të' Lë':

—Jesús, bönni' Nazaret, riguíljatu'-në'.

Jesús rë' légaquië':

—Neda' caz.

Judas, bönni' na' rudödë' Jesús lu ná'agaquië', zóalenë' légaquië'.

⁶ Cate' Jesús gudxë' légaquië': “Neda' caz”, ní'irö bulu'bíguë'ë cusi zxanlö, en gula'dzö'ë lu yu. ⁷ Jesús gunábinë' légaquië' leyúbölö, rnnë':

—¿Nuzxi riguíljalí'?

Të' Lë':

—Jesús, bönni' Nazaret, riguíljatu'-në'.

⁸ Ní'irö bubil'ë didza' Jesús, rnnë':

—Chigúdx'a' libí'ili': Neda' caz. Channö riguíljalí' neda', guli'güí'-gáquië' lataj tsöjhuójgaquië' bönni' ni.

⁹ Caní gunné' Jesús para idxín didza' na' bë'ë, gunné': “Nupa ni bennu' quia', nitúë' bití' bunítia'-në'.” ¹⁰ Ní'irö, tu' nu'ë Simón Pedro tu guíë tuchi', gulecjë' le, en bentë' huë' Malco, tu bönni' huen dxin queë' bixúz lo, guchúguië' guídi náguië' ibëla bönni' na'. ¹¹ Ní'irö Jesús rë' Pedro na':

—Bugú'u guíë tuchi' quiu' lidxi. ¿Naru' cabí ral-la' quí'i saca'a lë na' chinunë' Xuza' ca gaca quia'?

Ridxinë' Jesús lahuë' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' röjáquië' gudil-la, en bönni' na' nacu'ë lu në'ë, enca' yugu' bönni' ni'a ná'agaquië' bönni' judío unná bë' gula'zönë' Jesús, en gulúgui'ë Lë'. ¹³ Ní'irö gula'ché'ë Lë' zí'alö lahuë' Anás, tu' náquië' xto' zxí'inë' Caifás, bönni' náquië' bixúz lo iz na'. ¹⁴ Náquië' Caifás bönni' na' buzéajni'inë' yugu' bönni' judío unná bë', buluí'inë' légaquië' dxí'arö gaca gátië' tuzë' bönni', en calëga initi idútë yödzo quégaquië'.

Rnnë' Pedro: "Biti' núnbë'a-në' Jesús"

(Mt. 26:69-70; Mr. 14:66-68; Lc. 22:55-57)

¹⁵ Simón Pedro, en ia'tué' bönni' usëda queë' Jesús yöjáquië' cúdzu'lë' Lë', söjnógaquië' Lë'. Bönni' usëda ni guyázalenë' Jesús lö'a que lidxi bixúz lo, tu' núnbë'ë bixúz lo na' lë'. ¹⁶ Bugá'anë' Pedro ní'ilö ga nu riyaza lö'a na'. Que lë ni na' burúajë' bönni' usëda na' núnbë'ë bixúz lo lë', ate' bë'lenë'-nu didza' nigula na' run chí'inu ga nu riyaza lö'a na', ate' benë' ga guyázië' Pedro lö'a. ¹⁷ Ní'irö nigula na' run chí'inu ga nu riyaza lö'a rënu Pedro, rnnanu:

—¿Naru' cabí do'o ca' li' bönni' ni?

Bubi'ë didza' Pedro, rnnë':

—Calëga neda'.

¹⁸ Tu' run ziaga, yugu' bönni' huen dxin, en yugu' bönni' ni'a ná'agaca bönachi yudo' nabéquigaquië' guí', ate' zuíguequinë' ra' guí' na', en tu'tsë'e cuíngaquië'. Lësca' Pedro zuílenë' légaquië', rutsë'e cuinë'.

Bixúz lo rinabi yúdxinë' Jesús

(Mt. 26:59-66; Mr. 14:55-64; Lc. 22:66-71)

¹⁹ Ní'irö gunabi yúdxinë' bixúz lo Jesús para inózinë' nupxi dá'gaca Lë', en nacxi naca le rusedinë' Jesús bönachi. ²⁰ Bubi'ë didza' Jesús, rë' lë':

—Lahui' lo bë'lëna' yúgu'të bönachi didza'. Buseditiqui'sida' légaquië' gapa naca lu yu'u ga tu'dubë' tu'sëdë' queë' Dios, enca' chila yudo', ga ni' tu'dubë' yúgu'të bönni' judío, en biti' bi didza' bë'a bagáchi'sö.

²¹ ¿Bizx que rinabi yúdxinu' neda'? Gunabi yudxi nupa ni' bila'yöni didza' bë'lëna' léguequi. Nózguequi quézinë' bönni' na' didza' na' bë'lëna' légaquië'.

²² Cate' budxi bë'ë Jesús didza' ni, tu bönni' ni'a ná'agaca bönachi yudo' gudápë'ë ru'ë Jesús, rnnë':

—¿Naru' caní rubí'itso' didza' lahuë' bixúz lo?

²³ Bubi'ë didza' Jesús, rë' lë':

—Channö bitì' gunní'a' dxi'a, gudixjö' bízxilö didza' bë'a bitì' naca dxi'a, en channö guca dxi'a didza' bë'a, ìbizx que na' gudápu'u neda'?

²⁴ Ní'irö Anás na' gusól-lë'ë Jesús náguë'ë, ate' bulu'sudxinë' Lë' lahuë' Caifás, bönni' náquië' idú bixúz lo.

Leyúbölö rnnë' Pedro: "Bitì' núnbë'a-në' Jesús"

(Mt. 26:71-75; Mr. 14:69-72; Lc. 22:58-62)

²⁵ Cate' ni' zuínë' Pedro ra' guí' rutsë'e cuinë', yugu' bönni' nacu'ë ni' gulé' lë', ta'nnë':

—¿Naru' cabí do'o ca' li' Jesús na'?

Gudá'baguië' Pedro, rnnë':

—Calëga neda'.

²⁶ Zoë' ni' tu bönni' huen dxin queë' bixúz lo, náquië' di'a dza queë' bönni' na' Pedro guchúguië' guídi náguië', ate' bönni' huen dxin na' rë' Pedro:

—¿Naru' cabí bilé'e quézida' li' la' yëla ni', dzagu'-në' Jesús?

²⁷ Leyúbölö gudá'baguië' Pedro, ate' la' guródxitëba' böra.

Ridxinë' Jesús lahuë' Pilato

(Mt. 27:1-2, 11-14; Mr. 15:1-5; Lc. 23:1-5)

²⁸ Ní'irö gula'ché'ë Jesús, en bulu'zë'ë lidxë' Caifás na', ate' bila'dxinë' yúlahui' queë' bönni' yu'u lu në'ë uláz que yödz Roma, le nazí'i le Pretorio. Chizá' rení' dza na', ate' bitì' gula'yázië' yugu' bönni' judío yúlahui' na', tu' téquinë' ila'báguë'ë xíguia' channö ila'yázië' ni', le gun ga bitì' gaca ilahuë' xtsö' Laní Pascua, laní na' tu'subanë' ca benë' Dios, bubéajë' bönachi Israel luyú Egipto. ²⁹ Ní'irö birúajë' Pilato, bönni' na' yu'u lu në'ë, en bidxinë' ga na' nacu'ë, ate' rë' légaquië':

—¿Bizxi ruzégui'li'-në' bönni' ni' didza'?

³⁰ Bulu'bi'ë didza', të' lë':

—La'tu' cabí nu'ë bönni' ni' dö', bitì' udóditu'-në' lo'.

³¹ Ní'irö Pilato rë' légaquië', rnnë':

—Libí'i cázali' guli'ché'ë, en buli'chi'a buli'söró Lë' ca rinná bë' xibá queéli'.

Yugu' bönni' judío të' lë', ta'nnë':

—Bitì' dë lu na'tu' nu' gútitu'.

³² Caní guca para idxín xtídzë'ë Jesús, le bë'ë naca ral-la' gátie'.

³³ Ní'irö buázië' Pilato yúlahui' na', ate' bulídzë' Jesús, en rë' Lë':

—¿Nacu' Li' Bönni' Rinná Bé'enë' Bönachi Judío?

³⁴ Bubi'ë didza' Jesús, rë' lë':

—¿Naru' rácasö quiu' rnno' caní, o gulé' bönachi li' caní ca naca quia'?

³⁵ Pilato rë' Lë':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bë' bulu'dödë' Li' lu na'a. ¿Bizxi caz benu'?

³⁶ Ní'irö bubi'ë didza' Jesús, rë' lë':

—Rinná bë'a neda', pero calëga ca ta'nná bë' bönachi yödzölió ni. La'tu' rinná bë'a ca ta'nná bë' bönachi yödzölió, ila'dil-lë' bönni' dá'gaquië' neda', para cabí ilu'ë lataj nu udödi neda' lu ná'agaquië' bönni' judío. Ca rinná bë'a neda' biti' naca ca ta'nná bë' bönachi yödzölió ni.

³⁷ Ní'irö Pilato rë' Lë':

—¿Nácatso' bönni' rinná bë'ë?

Bubi'ë didza' Jesús, rë' lë':

—Naca' ca na' rnno'. Que lë ni na' bida' ga gulja' yödzölió ni, para guna' ba nalí que le naca idútë li. Yúgu'të nupa ni tun le naca idútë li tu'zé nágagaca didza' ruá'a.

³⁸ Pilato rë' Lë':

—¿Bizxi na' le naca idútë li?

Ta'chúguië' queë' Jesús gátië'

(Mt. 27:15-31; Mr. 15:6-20; Lc. 23:13-25)

Cate' budxi gunné' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Biti' bi dö' ridzólida' nu'ë bönni' ni. ³⁹ Libí'ili' dë tu le nulaga loli' runli' cate' raca Laní Pascua ni, rinábili' neda' usana'-në' queéli' tuë' bönni' nadzunë'. ¿Ré'ënili' usana'-në' queéli' Bönni' Rinná Bé'enë' Bönachi Judío?

⁴⁰ Ní'irö yúgu'të' gulu'ë zidzaj didza' leyúbölö, ta'nnë':

—iCalëga bönni' ni, pero Barrabás usanu'-në' queétu'!

Barrabás na' náquië' gubán.

19 ¹ Ní'irö Pilato guchë'ë Jesús, en benë' ga gula'guínë' yugu' bönni' röjáquië' gudil-la Lë'. ² Bönni' röjáquië' gudil-la na' gulunë' tu bregui' ni'a në'e yötsi', ate' bulu'dxíë' le icjë' Jesús, en bulu'gácuë' Lë' tu lari' tunna xiná chul-la ca naca le tácuë' bönni' ta'nná bë'ë. ³ Ní'irö gula'biguë'ë lahuë' Jesús, en të' Lë':

—iBica' bo' Li', Bönni' Rinná Bé'enë' Bönachi Judío!

Ní'irö gula'gápë'ë lahuë'.

⁴ Ní'irö burúajë' Pilato, en rë' yugu' bönni' judío unná bë', rnnë':

—Buli'yú, rubéaja'-në' loli' ni para inózili' biti' bi rudzólida' le naca dö' nu'ë bönni' ni.

⁵ Ní'irö birúajë' Jesús, dxía icjë' bregui' ni'a në'e yötsi' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

⁶ Cate' yugu' bixúz unná bë', en yugu' bönni' ni'a ná'agaquië' bila'lé'enë' Jesús, zidzaj gulu'ë didza', ta'nnë':

—iBudé'ë lë'e yaga cruz! iBudé'ë lë'e yaga cruz!

Pilato rë' légaquië':

—Libí'i cázali' guli'ché'ë, en guli'tsöjdé'ë lë'e yaga cruz. Neda' biti' bi dö' budzólida' nu'ë bönni' ni.

⁷ Ní'irö bönni' judío na' të' lë':

—Dë queétu' tu xibá, ate' rinná bë' xibá queétu' na' ral-la' gátië' bönni' ni tu' gunné' náquië' Zxí'inë' Dios.

⁸ Cate' biyönnë' Pilato didza' ni, gúdxirönë'. ⁹ Leyúbölö buázië' yúlahui' na', en rë' Jesús:

—¿Gáxxitë bönni' Li'?

Biti' bi didza' bubi'ë Jesús.

¹⁰ Ní'irö Pilato rë' Lë':

—¿Naru' cabí ubí'itso' didza', quíxjöi'inu' neda'? ¿Naru' cabí nózinu' dë lu na'a udá'a Li' lë'e yaga cruz, en dë lu na'a usana' Li'?

¹¹ Bubi'ë didza' Jesús, rë' lë':

—Biti' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabága'rë' xíguia' ca li'.

¹² La' ní'isö rizóa ribö'ë Pilato usanë' Jesús, pero gulu'ë zidzaj didza' bönni' judío unná bë', ta'nnë':

—Channö usanu'-në' bönni' ni, biti' ridzagu'-në' dxi'a César, bönni' rinná bé'enë' idútë yödzölió. Nu bönni' run cuinë' bönni' rinná bë'ë, ridá'báguë'ë César na'.

¹³ Cate' biyönnë' Pilato didza' ni, gunná bé'enë' nupa diguá'gaca Jesús, ate' gurö'ë xilatjë' ga ruchi'a rusöröë', lataj na' nazí'i le Lö'a Ga Zxóagaca Guiöjta'a, en ca naca didza' hebreo nazí'i le Gabata. ¹⁴ La' dza ná'asö naca dza si' idxín Laní Pascua, en naca idú hua gubidza. Ní'irö Pilato gudxë' yugu' bönni' judío unná bë' na', rnnë':

—Ni zoë' bönni' rinná bé'enë' libí'ili'.

¹⁵ Gulu'ë zidzaj didza', ta'nnë':

—iBétië'! iBétië'! iBudé'ë lë'e yaga cruz!

Pilato rë' légaquië':

—¿Rinábitseli' neda' udá'a-në' lë'e yaga cruz bönni' rinná bé'enë' libí'ili'?

Bulu'bi'ë didza' bixúz unná bë', ta'nnë':

—Cúnturö nu zoa rinná be'e netu'. Tuzë' César rinná bé'enë' netu'.

¹⁶ Que lë ni na' Pilato budödë' Jesús lu ná'agaquië', para tsöjdá'agaquië' Lë' lë'e yaga cruz. Ní'irö gula'guélë'ë Jesús, en gula'ché'ë Lë' ní'ilö.

Tu'dé'ë Jesús lë'e yaga cruz
(Mt. 27:32-44; Mr. 15:21-32; Lc. 23:26-43)

¹⁷ Birúajë' Jesús ni', nu'ë yaga cruz queë', sa'yéajë' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota.

¹⁸ Bulu'dé'ë Jesús lë'e yaga cruz ni', ate' bulu'dá'lenë' Lë' tsözxón lé'egaca yaga cruz ia'chopë' bönni'. Tsölá'a huéaj ta'dé'ë, ate' Jesús dë'ë gatsaj láhui'lö chopë' bönni' na'. ¹⁹ Gusól-lë'ë Pilato tu bönni' nu'ë le buzúajë' lu guichi le buzóë' lë'e yaga cruz icjlë' Jesús, le rnna caní: “Jesús, Bönni' Nazaret, Bönni' Rinná Bé'enë' Bönni' Judío.” ²⁰ Bulu'labë' zían bönni' judío didza' ni, tu' zoa ga na' bulu'dé'ë Jesús lë'e yaga cruz gála'sö ra' yödzo, ate' didza' na' nuzúajë' len didza' hebreo, en len didza' griego, en len didza' latín. ²¹ Yugu' bixúz unná bë' quégaquië' bönni' judío të' Pilato, ta'nnë':

—Biti' uzúaju', “Bönni' Rinná Bé'enë' Bönni' Judío.” Buzúaj caní: “Bönni' ni gunné': Inná bé'eda' bönni' judío.”

²² Bubi'ë didza' Pilato, rë' légaquië':

—Le chinuzúaja', tsaz chinuzúaja'.

²³ Cate' yugu' bönni' na' rójáquië' gudil-la budxi bulu'dé'ë Jesús lë'e yaga cruz, gula'guélë'ë lari' gúcuë'. Gula'béajë' tápalö, tu cö' huéaj guta' que queégaquië'. Gula'guélë'ë ca' lari' guxóa yenë' Jesús, ate' lari' na' biti' nadía, pero naduba tuz ca naduba. ²⁴ Ní'irö yugu' bönni' na' rójáquië' gudil-la gulé luzá'agaquië' tuë' ia'túë', ta'nnë':

—Biti' ichúguru' le, pero dxí'arö gaca uyuru' le gaca bë' para inóziru' nuzxi guequi que.

Caní guca, budxín ca nazúaj lu guichi lá'ayi, le rnna:

Gula'guísië' que queégaquië' lari' nacuá',

en que lari' quia' bulu'yúë' le naca bë'.

Caní gulunë' bönni' na' rójáquië' gudil-la.

²⁵ Xiné'ë Jesús, en nigula zxílanu xiné'ë, en María, nigula queë' Cleofas, en María Magdalena gula'cuá'anu gala' ga na' dë'ë Jesús lë'e yaga cruz. ²⁶ Cate' Jesús bilé'enë'-nu xiné'ë, en bilé'enë' ca' zoë' ni' bönni' usëda queë' na' nadxí'inë', gudxë'-nu xiné'ë:

—Na'a, na' zoë' zxí'ínu'.

²⁷ Ní'irö gudxë' bönni' usëda queë' na':

—Na' zóanu xinó'o.

Bönni' usëda na' benë' ga yöjsóanu lidxë' la' dza ní'isö.

Le guca cate' gutië' Jesús
(Mt. 27:45-56; Mr. 15:33-41; Lc. 23:44-49)

²⁸ Gudödi ni, tu' nózinë' Jesús yúgu'të chibóa budzaga lahui, en para udxín le nazúaj lu guichi lá'ayi, gunné':

—Ribidxa' nisa.

²⁹ Dë ni' tu zxiga' yudzu nupi zi. Ní'irö yugu' bönni' na' rōjáquië' gudil-la bulu'gui'jë' nupi zi na' tu le bululu rizxupi nisa, ate' bulu'zöë' le tu lahui gui, en bulu'dé'ë le ru'ë Jesús para xupë'. ³⁰ Budxi gu'ë Jesús nupi zi na', gunné':

—Chinácatë.

Ní'irö buzōtaj icjë'. Burúajtë bö' naca cazë', gútië'.

Tu bönni' reajë' gudil-la runé'ë yaga tuchi' cuita lë'ë Jesús

³¹ Ní'irö, tu' naca dza si' idxín Laní Pascua na', en tu' cabí ral-la' ulu'gá'ana nupa nátigaca lé'egaca yaga cruz cate' naca dza lá'ayi quégaquië', le naca tu dza lá'ayi zxöntë, que lë ni na' yugu' bönni' judío guláta'yuë' lahuë' Pilato guíë' bönni' rōjáquië' gudil-la tsōjtítsjagaquië' xiguíchjagaquië' bönni' dá'gaquië' lé'egaca yaga cruz, en ulu'zōtjë' légaquië' lé'egaca yaga cruz na'. ³² Que lë ni na' gula'biguë'ë bönni' rōjáquië' gudil-la, ate' gula'guítsjë' xiguichjë' bönni' zí'alö, en lësca' caní gulunë' queë' ia'túë' bönni' na' dá'lenë' Jesús lë'e yaga cruz.

³³ Cate' bila'dxinë' ga na' dë'ë Jesús, en bila'lé'enë' chinátië', bití' gula'guítsjë' xiguichjë'.

³⁴ Ní'irö tuë' bönni' na' reajë' gudil-la buné'ë yaga tuchi' cuita lë'ë Jesús, ate' la' birúajtë rōn, en nisa. ³⁵ Neda', Juan, bilé'eda' lë ni, en runa' ba nalí que, ate' le runa' ba nalí naca idútë li. Nöz quézida' ruá'a didza' idútë li, para tséajlë'ëli' ca' libí'ili' ca naca queë' Jesús. ³⁶ Gulaca yugu' lë ni para budxín le nazúaj lu guichi lá'ayi, le rnna: “Bití' gatsaj nitú dxita yu'ë.” ³⁷ Ia'tú le nazúaj ca' lu guichi rnna caní: “Ulu'yúë' bönni' na' bulu'né'ë lë' yaga tuchi'.”

Tu'cáché'ë Jesús

(Mt. 27:57-61; Mr. 15:42-47; Lc. 23:50-56)

³⁸ Gudödi guca yúgu'të lë ni, gуйijë' José, bönni' yōdzō Arimatea, bönni' dë'ë Jesús, pero bagáchi'sö tu' rádxinë' yugu' bönni' judío unná bë', ate' gunábinë' Pilato gu'ë lë' lataj u'ë Jesús. Pilato bë'ë lë' lataj. Ní'irö bidxinë' José ga na' dë'ë Jesús lë'e yaga cruz, ate' bu'ë Lë'.

³⁹ Lësca' bidxinë' Nicodemo ni', bönni' na' gуйijë' zí'alö yōjyúë' Jesús chi'i dzó'ölö, nu'ë tu le nutsí'i nōri silá' que mirra, en tu le rilá' zxixi, le naca ca tu gayuá' guíë. ⁴⁰ Ní'irö José, en Nicodemo na' gula'guélë'ë Jesús, en bulu'chólinë' Lë' yugu' lári'do', ate' gula'gu'ë láhuilö lë na' nutsí'i nōri silá' que mirra, en le rilá' zxixi. Gulunë' ca nalébiguequinë' tunë' bönni' judío cate' tu'cáché'ë tu bönni' nati. ⁴¹ Gala' ga na' bulu'dé'ë Jesús lë'e yaga cruz dë tu luyú ga zeaj da' yaga olivo, ate' gatsaj láhui'lö lataj na' zoa tu yeru ba cubi le nadaj lë'e guí'a guíój, yeru ba na' cuntu nu ta'güí'inë'. ⁴² Lu yeru ba na' gula'gu'ë Jesús tu' dë gála'sö yeru ba na', en tu' naca dza tu'pé'ë bönni' judío que Laní Pascua.

Rubanë' Jesús lu yöl-la' guti
(Mt. 28:1-10; Mr. 16:1-8; Lc. 24:1-12)

20 ¹ Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guiójt'a na' busayaj ga nu riyaza yeru ba na'. ² Ní'irö bóajnu carelö ga zoë' Simón Pedro, dzáguië' lë' ia'túë' bönni' usëda, bönni' na' Jesús nadxí'inë' lë', ate' rënu légaquië':

—Bulu'béajë' Xanru' yeru ba ni', en biti' nöztu' gazxi gula'gu'ë Lë'.

³ Ní'irö bila'rúajë' Pedro, en ia'túë' bönni' usëda na', sôjáquië' ra' yeru ba na'. ⁴ Tsözxón ta'xíti'ë iropë', pero ia'túë' bönni' usëda na' guxíti'rë' carelö ca Pedro, ate' zí'alö lë' bidxinë' ra' yeru ba na'. ⁵ Biyéchuë', en buyüë' lu yeru ba na', ate' bilé'enë' yugu' lári'do' na' bila'röli-në' Jesús, nacuá' ni', pero biti' guyázië' yeru ba na'. ⁶ Ní'irö bidxinë' Simón Pedro cúdzu'lë' ia'túë' bönni' usëda na', ate' guyázië' lë' yeru ba na', en bilé'enë' lári'do' na' nacuá' ni'. ⁷ Lësca' bilé'enë' lári'do' na' gula'xóë' icjë' Jesús, biti' dëlen ia'zica'rö lári'do' na', pero tsölá'alö nudubi quez. ⁸ Ní'irö guyázië' ca' ia'túë' bönni' usëda na' bidxinë' zí'alö ra' yeru ba na', en bilé'enë' ca na' naca, ate' guyéajlë'ë didza' bë'ë Jesús. ⁹ Caní guca, tu' cabí ta'yéajni'ininë' le nazúaj lu guichi lá'ayi ca run bayudxi gaca queë' Jesús, ate' ubanë' lu yöl-la' guti. ¹⁰ Ní'irö iropë' bönni' usëda na' yôjhuójgaquië' lídxigaquië'.

Ruluí'i lahuë' Jesús lonu María Magdalena
(Mr. 16:9-11)

¹¹ Bugá'ananu María ní'ilö ra' yeru ba na', ribódxinu. Tsanni ni' ribódxinu, biyéchunu, buyunu lu yeru ba na'. ¹² Bilé'enu chopë' gubáz lá'ayi queë' Dios ni', nácugaquië' lari' chiguichi. Ró'ögaquië' ni', tuë' ícjalö ba na', en ia'túë' xiní'alö ba na' ga ni' gula'gu'ë Jesús. ¹³ Yugu' gubáz lá'ayi na' të' lënu, ta'nnë':

—Nigúlado', ¿bizx que ribödxu'?

Rënu légaquië':

—Tu' bulu'ú'ë Xana', en biti' nözda' gazxi gula'gu'ë Lë'.

¹⁴ Cate' budxi gunnúanu caní, buécjanu, en bilé'enu-në' Jesús, zoë' ni', pero biti' réquibe'enu Jesús na'. ¹⁵ Ní'irö Jesús gudxë'-nu:

—Nigúlado', ¿bizx que ribödxu'? ¿Nuzxi ruguilju'?

Tu' réquinu náquië' Lë' bönni' rapa chi'ë latja na', rënu Lë':

—Bönni', channö lí' bu'u-në', gudíxjöi'i neda' gazxi gulú'u-në', ate' neda' u'a-në'.

¹⁶ Ní'irö Jesús gudxë'-nu:

—María.

Ní'irö buécjanu, en lu didza' hebreo rënu Lë':

—Raboni.

Didza' ni rnna: Bönni' Usedi quia'.

¹⁷ Jesús rë'ë-nu:

—Biti' canu' neda', tu' cabí ruhuépinida' ga zoë' Xuza'. Na'a, guyéaj ga nacu'ë böchi' luzá'a, ate' yöjödxi-gáquië': "Caní rnnë' Jesús: Huëpa' ga zoë' Xuza', náquië' ca' Xúzili'. Náquië' Dios quia', en Dios queéli'."

¹⁸ Ní'irö guyéajnu María Magdalena na', yöjtíxjöi'inu yugu' bönni' usëda queë' Jesús chibilé'enu-në' Xanru', en ca naca didza' na' gudxë'-nu.

Ruluí'i lahuë' Jesús lógaquië' bönni' usëda queë'

(Mt. 28:16-20; Mr. 16:14-18; Lc. 24:36-49)

¹⁹ Cate' chigul-la la' dza ná'asö, le naca dza risí lo gadxi dza, nudúbigaquië' bönni' usëda queë' Jesús, ate' nayayaj yu'u ga na' nacu'ë tu' tádxinë' bönni' judío unná bë'. Ní'irö buluí'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

²⁰ Cate' budxi gudxë' légaquië' didza' ni, buluí'inë' légaquië' në'ë, en cuita lë'ë. Ní'irö tu'dzéjanë' yugu' bönni' usëda na' tu' tu'lé'enë' Xanru'.

²¹ Ní'irö Jesús rë' légaquië' leyúbölö, rnnë':

—Guli'zóa dxi ládxi'li'. Ca benë' Xuza', gusöl-lë'ë neda', lësca' caní risól-la'a libí'ili' tsöjenli' xichina'.

²² Cate' budxi gunné' caní, bulubë' lógaquië', en rë' légaquië':

—Guli'sí' Dios Bö' Lá'ayi. ²³ Núti'tës nu uniti loli', nu na' ben dul-la', chiyú'u yöl-la' runiti lo que, ate' núti'tës nu bití' uniti loli' le, ugá'ana dul-la' que nu na' nun dul-la'.

Biti' réajlë'ë Tomás

²⁴ Tomás bití' zóalenë' légaquië' cate' Jesús buduyúë' légaquië'.

Náquië' Tomás tuë' bönni' chínnuë' ni', en tu'ë ca' lë' Bönni' Bilidi'.

²⁵ Gudödi ni' ia'zica'rë' bönni' usëda na' gulé' Tomás, ta'nné':

—Chibilé'etu'-në' Xanru'.

Tomás rë' légaquië':

—Channö cabí ilé'eda' në'ë ga gunné' bididaj, en unë'a xibón na'a ga na' guné'gaca bididaj na', en unë'a na'a cuita lë'ë ga na' gunné' yaga tuchi', bití' ca' tséajlë'a.

²⁶ Cate' chigudödi ia'xunu' dza, nudúbigaquië' bönni' usëda na' leyúbölö lu yu'u, ate' Tomás na' zóalenë' légaquië'. Sal-la' nayayaj yu'u ga na' nacu'ë, buluí'i lahuë' Jesús gatsaj láhui'lö ga na' nacu'ë, en rë' légaquië':

—Guli'zóa dxi ládxi'li'.

²⁷ Ní'irö Jesús rë' Tomás na':

—Buné' xibón no'o ni, en buyú na'a ni. Buné' no'o cuita lë'a ni, en bíti'rö gaca chopa ládxu'u, pero guyéajlë' neda'.

²⁸ Ní'irö bubi'ë didza' Tomás, rë' Lë':

—Xána'do', en Dios quia'.

²⁹ Jesús rë' lë':

—Tomás, tu' bulé'enu' neda', réajlë'u. Bica' ba nupa ni' ila'yéajlë' neda' sal-la' biti' ila'lé'eni neda'.

Le ré'ëni gun didza' nazúaj lu guichi ni

³⁰ Benë' Jesús zíanrö ca' yöl-la' huáca lógaquië' bönni' usëda queë', le cabí nazúajgaca lu guichi ni. ³¹ Yugu' lë ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxí'inë' Dios, en cate' tséajlë'ëli', gata' queëli' yöl-la' na'bán idú tu' réajlë'ëli'-në'.

Ruluí'i lahuë' Jesús lógaquië' gadxë' bönni' usëda queë'

21 ¹ Gudödi guca lë ni, leyúbölö buluí'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' buluí'i lahuë' lógaquië'. ² Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzö Caná que luyú Galilea, en chopë' bönni' zxí'inë' Zebedeo, en ia'chopë' ca' bönni' usëda queë' Jesús. ³ Simón Pedro rë' légaquië':

—Tseaja' tsöjxöna'-ba' böla.

Të' lë' ia'zica'rë', ta'nnë':

—Guntu' li' tsözxón.

Ní'irö yöjáquië', en gula'benë' tu lë'e bárcodo', ate' rëla ni' nituba' böla biti' gula'zönë'-ba'. ⁴ Cate' chizá' rení', yöjsöë' Jesús luyú ra' nisa na', pero biti' téquibe'enë' bönni' usëda queë' Jesús Lë' na'. ⁵ Ní'irö Jesús rë' légaquië':

—Zxí'ina'do', ñnaru' cabí deba' lati' böla queëli'?

Bulu'bi'ë didza', të' Lë':

—Nituba'.

⁶ Ní'irö Jesús rë' légaquië':

—Guli'chílaj yöxaj böla queëli' tsölá'a ibëla barco, ate' sóngacali'-ba'.

Ní'irö gula'chiljë' le, ate' bíti'rö guca ulu'béajë' le, tu' naguíraba' böla lë'e yöxaj böla na'. ⁷ Ní'irö bönni' usëda na' nadxí'inë' Jesús lë' rë' Pedro, rnnë':

—iXanru' na'!

Cate' biyönnë' Simón Pedro, “Xanru' na'”, böácuë' lari' gúcuë', tu' nagúë' le zí'alö, ate' guyázië' lu nisa. ⁸ Bila'dxinë' ia'zica'rë' bönni' usëda na', tu'sé'ë barco na', suná'ayöjgaquië' yöxaj ga na' dzó'öba' böla, tu' cabí naca zi'tu' ga dë luyú bidxi. Nácatë ca tu gayuá' löga' ní'aru'.

⁹ Cate' bila'dxinë' luyú bidxi na', bila'lé'enë' rö'ö tu guí' bo' yalaj ni', en zxóaba' tuba' böla láhuilö, en dë ca' yöta ni'. ¹⁰ Jesús rë' légaquië':

—Guli'diguá'a-ba' ni böla na' si' guzxóngacali'-ba'.

¹¹ Gurenë' Pedro lë'e barco na', ate' gú'uyöjë' yöxaj na' zaca' luyú bidxi, nalíró-ba' böla zxön, idú tu gayuá' yu' chí'inu-unba'. Sal-la' nácagacaba' böla zián, biti' biröza' yöxaj na'. ¹² Ní'irö Jesús rë' légaquië':

—Guli'dá gáguli'.

Biti' burúguinë' nitúë' bönni' usëda queë' na' inábinë' Lë', inné': “¿Nuzxi Li'?” Nózguequi quézinë' náquië' Xanru'. ¹³ Ní'irö gubíguië' Jesús, en gudélë'ë yöta na', enca' böla na', ate' bë'ë quégaquië'.

¹⁴ Lë' ni naca le bunni luzuí bulu'i lahuë' Jesús lógaquië' bönni' usëda queë' gudödi bubanë' lu yöl-la' guti.

Jesús ruí'ilenë' Simón Pedro didza'

¹⁵ Cate' budxi gulahuë', Jesús rë' Simón Pedro:

—Simón, xzí'inë' Jonás, ¿naru' nadxí'irönu' neda' ca nadxí'iguequinë' bönni' ni neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' xzí'la'do' quia'.

¹⁶ Jesús rë' lë' le buropi luzuí, rnnë':

—Simón, xzí'inë' Jonás, ¿naru' nadxí'inu' neda'?

Bubi'ë didza' Pedro, rë' Lë':

—Ön, Xan. Li' nöz quézinu' raza ládxa'a Li'.

Jesús rë' lë':

—Bugagu yugu' bö'cu' xzila' quia'.

¹⁷ Jesús rë' lë' le bunni luzuí:

—Simón, xzí'inë' Jonás, ¿raza ládxu'u neda'?

Buí'innë' Pedro tu' le chibunni luzuí rinabi yúdxinë' lë', gunné':

“¿Raza ládxu'u neda'?” Bubi'ë didza' Pedro, rë' Lë':

—Xan, yúgu'të nöz quézinu' Li'. Nózinu' raza ládxa'a Li'.

Jesús rë' lë':

—Bugagu yugu' bö'cu' xzila' quia'. ¹⁸ Le nácate rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'o, ate' nu yúbölö ugacu li' lari', en iché' li' ga ni' biti' gué'ënnu' tseaju'.

¹⁹ Yugu' didza' ni bë'ë Jesús naca bë' naca gátië' Pedro, tsöjté'ë lë'e yaga cruz, para gaca yöl-la' ba queë' Dios. Cate' budxi gunné' caní Jesús, gunné' ca' ia'tú:

—Gudá' neda'.

Ru'ë didza' Jesús ca gaca queë' bönni' usëda na' nadxí'inë'

²⁰ Buécjë' Pedro, en bilé'enë' söjnáhuë' légaquië' bönni' usëda na' Jesús nadxí'inë' lë'. Náquië' bönni' usëda na' gurö'ë cuita lë'ë Jesús

cate' ni' gulahuë', en gudxë' Jesús: “Xan, ¿nuzxi na' udödi Li'?” ²¹ Cate' Pedro bilé'enë' lë', rë' Jesús:

—Xan, ¿bizxi gunë' bönni' ni?

²² Jesús rë' lë':

—Channö ré'ënda' ugá'anë' bönni' ni ga idxinrö dza huöda', biti' ral-la' cö'u böniga. Gudá'a neda' li'.

²³ Guzë didza' ni ga nacu'ë bóchi'ru' ta'yéajlë'ë Cristo. Téquinë' biti' gátië' bönni' usëda na'. Jesús biti' gudxë' lë' biti' gátië', pero caní gunné': “Channö ré'ënda' ugá'anë' bönni' ni ga idxinrö dza huöda', biti' ral-la' cö'u böniga.”

²⁴ Bönni' usëda ni naca' neda', Juan. Runa' ba nalí quéguequi lë ni, en nuzúaja' yugu' lë ni lu guichi, ate' nózili' naca idútë li le runa' ba nalí.

²⁵ Ziánrö ca' le benë' Jesús. Channö nu uzúaj léguequi lu guichi tu tu, rusaca' quia' biti' guequi yödzölió ni ila'cuá' guichi na' ral-la' nu uzúaj. Ca' caz.